

Yoan ma Peba Yoaninma Iriki God ma B'ogil Yirkokar Bage Yit Isipkita Yitkak

Onggityam God ma b'ogil yirkokar bage yit peba irika riga re Yoante. I ton re yipa Yesumna itmikitijog riga e. I intemb ji b'auyaena riga yena re Yesu singi yiyenenonj. I Yoan onggityam peba yirikonj re ama rika A.D. nainti dide wan andred (90-100) kemag gangga nat.

Yoan itemb peba yirikonj re nok mana da idenat ogenka rigap gar ke utkunda oramisi Yesum pilind, i ton ket yirkokar okasi (20:31). Si Yoan Yesund pitapita yomneny da Ton re Godinma ngirpu kesa yitkak e, yet re riga ji awonj dide wimena yikenonj riga wa wingirind.

I onggityam peband seben (7) sirar mile kae Yesund wingawinga nya ke pitapita yomneny, i onggityam ninda kid kesa kima danda wiko re awir im wekeny ninda b'ogil yirkokar bage yit peband. I rinsim re Yoan sirar mile useneniny, tonpimemb yimjatenyi da “Keriso re God e” i Ti opima ukoijog isipkita kesa danda dide mile yibnainy. I nangga ma ji da Yoan ukoijog danda kima yimjateny da “Yesu re Godinma B'iga e,” aji Yoan kwa ita yomneny Yesund da, “Ton re kea iminjog riga ji awonj.” Si odede mile kea aukenento Ti pilind opi re gim dinder i nony bebig i owoupa i dide singi b'iyena.

Yitkak Riga Jiwiwim Awonj

¹ God yimta kena komkesa gasa atobarkinonj, aji Yitkak re adea de naska get ke yibnonj. I itemb Yitkak adea de yibnonj God kima. Si itemb Yitkak re Godte. ² Otomapu wa onggit winind re God komkesa gasa atobarkinonj, itemb Yitkak, Ton kea adea de yibnonj God kima. ³ God komkesa gasa atobarkinonj re onggit Yitkakim pilkena. Si onggit Yitkak kesa makwa ngai yipa gasa aukonj rinsim re otobarki wekeny. ⁴ Yirkokar yibnonj re onggit Yitkakim pilnat, si onggityam yirkokarit ngaya na teteawonj riga wa. ⁵ I itemb ngaya b'anyoratena ikonj re sibib nat. Aji onggit sibibit makwa ririr na awonj itemb ngaya osoukam.

⁶ I God yipa riga yitmikitonj, i ton ket pita awonj. Tina nyi re Yoanit. ⁷ Ton ikonj re onggit ngaya gatab yir ungata yit riga wa pitapita omnena mana. Nokim da idenat tina yit ke komkesa rigap gar ke utkunda okasi. ⁸ Yoan re ma ton tilenggyam onggityam ngaya na. Aji ton ikonj re onggit ngaya gatab yir ungata yit pitapita omnena mana. ⁹ Itemb re iminjog ngaya na rinsim re komkesa riga ngaya anyorkeneniny. Si itemb ngaya kea ikonj onggit gowukoi wa. ¹⁰ I Ton kea onggit gowukoyind yibnonj. Si God onggityam gowukoi Ti pilkena yotobarkonj. Aji onggityam gowukoyit maka Tin yongwatonj. ¹¹ I Ton ikonj Tinajog Yuda Kantri wa. Aji Tinajog rigap Tin maka singi yiyeno, aji yisayowa. ¹² Aji yepiya ra Tin Yonggyamim imjatenyi dide Tina nyiwim pilind gar ke utkunda oramisi, God opima towa danda takainy Tina b'iga awowim. ¹³ Si opimemb God ma b'iga ukukene-

nanj re ma rigaina kus nya kaim, o rigaina gim ke singi kaim, o leomna singi kaim. Aji Godim pilkaima ukukenenanj.

¹⁴ I itemb Yitkak riga jiwim awonj. I ket Ton sowa wingir nat wimena yikenonj. Si sin kea Tina b'ogil inyomarena yir ongong yiyenonda. Itemb b'ogil inyomarena re lesmita B'igamna e yet re ikonj B'uim pilke. Ton re wurar dide iminjog yitkak ke yindangir omni na. ¹⁵ Si Yoan Ti gatab yir ungata yit pitapita amneninonj, i ket danda kima unenonj odede da, "Itemb ji riga yena re kon yomnond da, 'Yipa riga ita kor kak ke ik, i Ton re ukoi jog riga e, aji kon re goujog riga en, nokip Ton kea de get ke yibnonj re kon maka ukendond.'" ¹⁶ Si Ton re wurar dide iminjog yitkak ke yindangir auki na, si men komkesa Ti pilkaim usausapyam wurar okatena eyenindam. ¹⁷ Mop nokip God Tina gog yit aramisinonj re Mosem pilnat, i Mose akainonj Israel riga wa. Aji osiemb wurar dide iminjog yitkak tetkonda re dimdim Yesu Kerisom pilkena. ¹⁸ Makwa ngai ke yipa rigat Godind yir yongonj. Aji lesmita B'iga, Ton Tilenggyam re God e yet re ikonj B'uim pilke. Si Ton itemb riga wa pilwa Godind pitapita yomnenonj.

*Baptiso Yoanina Yesum gatab Yir Ungata Yit
(Mat 3:1-12; Mak 1:1-8; Luk 3:1-18)*

¹⁹ I Ju rigap yepiya re Yerusalem taunind wekenonj, ton ninda si riga dide Lebi riga emdito, i ket etmikurto Yoanin pilwa erkenam da, "Yetet man?" Si onggit winind kea Yoan yir ungata yit apulisinonj. ²⁰ Aji ton maka b'aimantonj dide

ton kea tilenggyam iminjog ke towa pitapita amnawonj da, “Kon ma Kerisoten.” ²¹ Seg ton ket yerkeno da, “Si yetet man ket? Man Eliyatet?” I Yoan amninonj da, “Nayi, ma kon Ton ten.” I kwa yomno da, “Ma man onggityam bageyam tet yena re God tirir yomnonj itmikitam?”* I ton ket mira amninonj da, “Nayi”. ²² Ngirpu ton kikitumjog yomno da, “Si yetet man ket? Man sowa mira yitkak nokaine towanim yepiya re sin nitmikuranj. Man rija e ket molenggyam b'atgenaet?” ²³ Si Yoan mira amninonj odede rija na re bageyam Isaya yindonj da,
 “Kon re bage yit unenam nonykok en wul kesa tunggind da,

‘Win Yonggyamimna nya dimdim yomnika!’ ”

²⁴ I omanda ta ninda Parisai rigaina itmikuri riga wekenonj. ²⁵ Si ton Yoanind yerkito odedemb da, “Nangga pae man daka riga baptiso amnikinyit, rada man ma Kerisotet, Eliyatet, i onggityam bageyamtet yena re God tirir yomnonj itmikitam?” ²⁶ Seg Yoan ten mira amninonj da, “Kon nyi kaim riga baptiso amnikinyin. Aji wa wingirind yipa Riga ita onyiti yibim yena re win maka yongwasya. ²⁷ Si Ton ita ik kor yimta ke. Si kon ma ririrkipjog riga en Tina yonginkak kai itreka wiko omniam rina ra goujog wiko rigat mile omnik.” ²⁸ Onggityam komkesa mile aukito re Betaniya taun nat rina re Yordan kelimind yipa tab wa yibnonj. Yoan riga baptiso amnikinonj re

* **1:21:** It re Yoan yinj da, “Onggityam bageyam” intemb yominy rina re God Mosend yomnonj da ita kon yipa bageyam itmikisin dem. Si Israel riga onggityam gatab wumir na wekenonj.

onggityam taun natemb.

God ma Mamoi B'iga Yesu

²⁹ Seg yipa bibir kak ke Yoan Yesund yir yongonj re Ton ti wipwip ikonj. I Yoan yindonj da, “Yir de, God ma Mamoi B'iga, yete re urowateniny gowukoi rigaina negir mile. ³⁰ Si kon inaemb ji riga yommenond da, ‘Yipa riga ita kor kak ke ik. I Ton re ukoi jog pumb riga e aji kon re goujog riga en, nokip Ton kea de get ke yibnonj re kon maka ukendond.’ ³¹ Koda makwa naskand Tin yongwatond. Aji kon netkond dide yu nyi ke riga baptiso amnikinyin, nokim da idenat kon Israel riga wa tauyaenyin onggityam riga.” ³² I Yoan itemb ji ket yipa yir ungata yit pitapita amnawonj da, “Kon yir yongen Yinayina Wingawingand. I Ton ket eouka ik wub kumb ke gimai re dide, i ket Ti kumbind igis. ³³ I koda kwa maka Tin yongwasin. Aji Godit ken nitmikitonj nyi ke riga baptiso omnikam. Tonitemb wumir nomnonj da, ‘Man ita Yinayina Wingawingand yir iyit eoukand dide igitand yipa rigam kumbind. Si indamaemb ji man ongwasit da itemb ji Riga yet ra Yinayina Wingawinga ke riga baptiso tamnikiny.’ ³⁴ Si kon kea onggityam mile yir yongen. Si onggit paemb kon ket yir ungata yit nitinjin da, ‘It re ji Riga God ma B'iga e.’ ”

Yesu ma Naskajog Nimog B'auyaena Riga

³⁵ Yipa bibir kak ke Yoan b'usaya tina nimog b'auyaena riga kima owinki wekenonj. ³⁶ I re Yesu menon yokatonj, Yoan Ti pilwa yir b'iskonj dide ket yindonj da, “Yir de, God ma Mamoi B'iga!” ³⁷ Si re onggityam nimog b'auyaena rigap tina opureni

yitkak utkundonda, ton kea ket Yesund yimta yundokonda. ³⁸ I Yesu itaingitonj dide ket ten yir angonj Tin yimta undokand. I ket ten arkitonj da, “Win nangga e oraka iya?” I ton ket Tin yomnonda da, “Rabi! Rokate Man mibnyit?” (Rabi engendi yitkak re ouyaena riga e.) ³⁹ Seg Yesu ten amnonj da, “Ayo tetka! I ita yir ongya.” Si onggit penaemb ton ekonda, i ket pipmet yir yongonda rikind re Ton yibnonj. I ton ket Yesu kima adea de ebnonda onggit bibirind. I win re ket simana gatab powa (4) kilok awonj. ⁴⁰ Si osi re nimog riga yepiya re Yoanind yutkundonda, ton kea ket Yesund yimta yundokonda. Si osi re onggit nimog riga wingirind, yipa riga re Simon Petrom yinggan Andreat. ⁴¹ I itemb re riga Andrea naskajog gasa yomnikonj re tinajog nany Simon na yodaronj. Si ton ket wumir yomnonj da, “Sin kea Mesiya yodarya.” (Mesiya engendi yitkak re Kerisote.) ⁴² I ton ket ti nanyind iyonj Yesum pilwa. I re Yesu Simonind yir yipkonj, Ton ket yomnonj da, “Man re Yoanin b'iga, Simontet. Rigap men ket nyi motgenai ra Kepa kae.” (Kepa engendi yitkak re Petrote.)

Pilip ake Natanael

⁴³ Yipa bibir kak ke re Yesu singi awonj Galili eriya wa menonim, Ton kea ket Pilipind yodaronj. Seg Yesu ket tin yomnonj da, “Yimta nundoke!” ⁴⁴ I Pilip re Betsaida taun ke riga na, si toda Andrea ake Petro re onggityam yipaina taun ke riga i. ⁴⁵ I Pilip ket Natanaelind yodaronj dide ket wumir yomnonj da, “Sin kea ji riga yodaru ya gatab na re Mose gog yit peband yirikonj dide bageyamip erikto. Ton re Najaret tunggam Yesute, Yosepimna

B'iga.” ⁴⁶ Si Natanael Pilipind yerkitonj da, “Ma Najaret? Si ita nangga b'ogil e ik onggit tungg ke?” I Pilip ket daka yomnonj da, “Metkim! Ita yir onget.” ⁴⁷ I re Yesu Natanaelind yir yongonj menonind Ti pilwa, Ton kea ti gatab yindonj da, “Yir de! Itemb ji iminjog Israel riga. Ti pilind awir e kwa b'anyginena mile.” ⁴⁸ Seg Natanael Yesund yerkitonj da, “Man nangga wumir kae odede nomnyit?” I Yesu ket mira yomnonj da, “Kon naska nata yir mongen re man pig wul wirand mibnyit. I ingkena ket Pilip men ara memok.” ⁴⁹ Si ingkenaemb ket Natanael Yesund pitand yomnonj da, “Ouyaena Riga-wii! Man re God ma B'iga et. I Man re Israel King et.” ⁵⁰ I Yesu ket tin yomnonj da, “Ma man onggit pae Kor pilind gar ke utkunda yoramisit re Kon wumir momnyin da Kon ke men yir mongen pig wul wirand? Onggityam mile re ma uko i im, aji man opima ket ukoijog mile yir tanginyit.” ⁵¹ I Yesu ket yit yismontonj da, “Kon iminjogjog wen tamninyin. Win ita wub yir ongya dem ipangendand, i ket opima aneru yir teyenindam dem pumb wa menonind Rigamna B'igam pilke dide pumb ke inkand kwa Ti pilwa.”

2

Molkongga Awowim Mile de Kanaan Taunind

¹ Re nowam bibir yokatonj, yipa molkongga awowim mile aukonj Kana taunind Galili eriya wingirind. I Yesumna mog re kea de wibnonj. ² Si onggityam molkongga awowim mile yonggyamwarip kea Yesu dide Tina b'auyaena riga engaukito. Si todaka ket kea

de wekenonj. ³ I onggityam milepund bebig aukonj re obai omnam ik kea b'undwatto. Si Yesumna mog ket Yesund yomnonj da, "Towa ke awir im ik." ⁴ I Yesu mira womnonj da, "Kongga! Nangga pae man onggityam bebig Kor pilwa iyit? Kor makaya win ririrkip ainy odede wiko omniam." ⁵ Si Ti mog wiko riga amninonj da, "Win ija ima gasa tamnikindam rija im ra Ton wen tengainy omniam." ⁶ I onggit winind Ju riga wa kea yipa iseka mile ebawonj. Si onggit mop penaemb ji siks (6) gimo ke omniki nyikak dikindemb wekenonj onggit metind. I yipa nyikak b'ogil e owam ama rika eiti (80) lita o minda wan andred twenti (120) lita nyi. ⁷ I Yesu ket wiko riga amninonj da, "Win nyikak angjikina nyi ke!" Seg ton ket nyikak angjikto ngirpu yindangir aukito. ⁸ I Yesu ket ten amninonj da, "Otade win nyi aurokina dide ket eyinam de diyamdiyam mopyam rigam pilwa!" Seg ton ket eito. ⁹ Si onggityam diyamdiyam mopyamit ket nyi ke auki ik met yotonkitonj. Aji ton maka wumir yokatonj ringkena iyo. Aji onggityam wiko riga yepiya re nyi aurokito, tonpiya tenta wumir wekenonj. Si onggityam diyamdiyam mopyam rigat sisil kongga kima rigand ara yiwonj da, "Metkim!" ¹⁰ I ton ket tin yomnonj da, "Si ija emb ji komkesa rigaina mile, ton naska b'ogil ik im taramitauranj ingauki riga wa. I ra ikit ten takasiny, ingkaemb ket burakak ik taramitauranj. Aji man b'ogil ik na so ameninyit ngirpu ite re ket otade." ¹¹ Si Yesu onggityam naskajog kid kesa kima danda wiko yomnikonj re Kana taun nat Galili eriya wingirind. I onggit omnika kenaemb

Ton Tina b'ogil inyomarena pita wa yomnonj. I Tina b'auyaena rigap toda kwa onggit omnika ke-naemb gar ke utkunda yoramito Ti pilind da, “Ton re God ma B'iga, Keriso e.”

Yesu Yinamet Kil kesa Yomnonj

(Mat 21:12-13; Mak 11:15-17; Luk 19:45-46)

¹² Onggit kak ke Yesu, Ti mog, Ti yingganwar i dide Tina b'auyaena riga kima wuwonj de Kaparnaum taun wa. Si ton demb de ma jog bibir na wekenonj.

¹³ I re Ju riga waina Uj Igwanti Nony Iyena Diyamdiyam Win wus wa awonj, Yesu ket yikonj Yerusalem taun wa. ¹⁴ I re Yesu yinamet aba wa yikonj, Ton kea yir anginonj kau b'asoga riga, mamoi b'asoga riga, gimai b'asoga riga i dide wulkip sensi omnena riga yepiya re kasand omniki wekenonj.* ¹⁵ I Yesu ket b'ipowa kai yiraskonj. Seg Ton ket komkesa b'asoga riga dide wulkip sensi omnena riga eaukeninonj yinamet aba ke, toda kwa kea mamoi dide kau. I Ton ket wulkip sensi omnena rigaina koin egmarkinonj. I kwa ket towaina kasa gu etongeninonj. ¹⁶ I Ton ket gimai b'asoga riga amninonj da, “Win ingkek ewaikurina ji onggityam gasa. Goro Kor B'u ma met yomnikya gasa b'asogapu metim.” ¹⁷ I re Yesumna b'auyaena rigap onggityam auki mile yir

* **2:14:** Ninda Ju riga yepiya re wuwenonj paja kantri ke, ton ma ririr na odede si b'anga iyenam yinamet wa, opi re kau, mamoi i gimai. Onggit penaemb yinamet aband si b'angga asogenento. I kwa Ju riga waina yinamet teks oramkapu wulkip re rigaina wip o nyi iriki kesa silba koin nena na, aji ninda kantri koin re rigaina wip o nyi iriki kima na. Si onggit penaemb wulkip sensi amnenento.

yongo, ton kea nony aukito onggityam yitkak rinte re yina peband iriki yibim da, “Abu kon moina metim ukoi singi e aukenenyin, si onggityam ukoi singite ken mu pembpemb omnika niyenyeny.”¹⁸ I re Ju riga waina wip iyoi rigap onggityam Yesumna mile yir angto, si onggit penaemb ton ket Yesund yerkitto da, “Man kea odede mile amnikinyit. Si Man nangga kid kesa kima danda wiko im sowa notouyainyit ringkae ra sin Moina danda imjasu da Man ririr et onggityam mile omnikam?”¹⁹ Yesu ket mira amninonj da, “Win onggityam yinamet yiyogika! Si Kon b'ogil e b'usaya orangen nowa bibir wingirind.”²⁰ Seg Ju riga waina wip iyoi rigap yismonggawo da, “Rigap onggityam yinamet yorango re poti siks (46) kemag kima na. Ma si Man nowa bibir wingir nate itemb met oranget dem?”²¹ Aji Yesu onggityam yinamet gatab yitnono aenonj re Tina ji mana.²² I re Yesu yimta ke utnyitonj uj ke, Tina b'auyaena rigap kea nony aukito nangga gatab na re Ton yitnono aenonj. Si onggit kak kenaemb ton gar ke utkunda yoramito yina peband dide onggityam yitkak rina re Yesu apureninonj.

Yesu Wumir e Komkesa Rigaina Gar

²³ I re Yesu Yerusalem taunind yibnonj Ju riga waina Uj Igwanti Nony Iyena Diyamdiyam Win wingirind, Ton ademb de ninda kid kesa kima danda wiko amnikinonj. Si re rigap onggityam Tina wiko yir angto, kea jogjog rigap gar ke utkunda yoramito Tina nyiwim pilind.²⁴ Aji Yesu maka Tina nony b'ijawa yoramitonj towa pilind. Mop nokip Ton wumir na komkesa riga.²⁵ Si Yesu

ma singi na awonj riga wa pilke riga wa gatab yir ungata yit okatam. Mop nokip Ton wumir e nangga e yibim rigaina garind.

3

Yesu dide Nikodemo

¹ I yipa riga yibnonj Parisai riga wa wingirind, i tina nyi re Nikodemot. I ton re Ju riga waina wip iyoi riga na. ² I yipa siwinyind, ton ket yikonj Yesum pilwa, i ket Yesund yomnonj da, “Ouyaena Riga-wii! Sin wumir im da man Godim pilke metkot re ouyaena riga na. Mop nokip ra maka ra God yipa rigam pilind ibim, ton makwa ririr e odede kid kesa kima danda wiko tamnikiny rinsim re man amnikeneninyit.” ³ Seg Yesu ket tin mira yomnonj da, “Kon iminjogjog men motinyin. Ra man maka b'usaya tukenjit, man ma ririr et God ma pumb tungg yir ongongim.” ⁴ I Nikodemo daka Yesund yerkitonj da, “Si ridede e kwa rigajog tukenj? Ririr e ton ti mogimna kom bora wa b'itgar, i ket tukenj?” ⁵ Yesu ket mira yomnonj da, “Kon iminjogjog men motinyin. Ra yipa riga maka ra tukenj nyi dide Yinayina Wingawinga ke, ton ma ririr e God ma pumb tungg wa b'itgar. ⁶ Si gim ke riga ji re rigaina ji kae tukenj, aji wingawinga ke riga re Yinayina Wingawinga kae tukenj. ⁷ Si man goro kid kesa tawim nangga yitkak gatab e re Kon wumir momnyin. Aji win b'ogla b'usaya tukenjin-dam. ⁸ I rib re tina singi ririr nate yikeny. Si ra man tina dudlam tutkunjit, aji man ma wumir et ringkae ta ik dide ritama ta yik. Komkesa Yinayina Wingawinga ke ukuki riga re toda kwa odede yipa wip imemb.” ⁹ Seg Nikodemo ket yerkitonj da, “Si

ridede e onggityam mile ririrkip tainy?" ¹⁰ Si Yesu ket tin mira yomnonj da, "Man re Israel riga wa ouyaena riga et. Si man nangga pae maka wumir mibnyit onggityam wingawinga gatab? ¹¹ Kon iminjogjog men motinyin. Sin insim apurenindam nangga im re sin wumir wekenyin. I sin insim yir ungata yit apurenindam nangga im re sin yir ongong eyenindam. Aji win makaima sowaina yir ungata yit emjatenindam. ¹² Kon gowukoi gasa kaim wen wumir amneninyin, aji win makaima yitkak gar ke utkunda ke akasindam. Si rada Kon pumb tungg gasa kaim yitnono tamneninyin, ridede im win onggityam yitkak gar ke utkunda ke takatenindam? ¹³ I makwa ke ngai yipa riga pumb tungg wa yikonj, aji inta yipaina, Rigamna B'iga yet re pumb tungg ke ikonj. ¹⁴ I rigap b'ogla Rigamna B'igand urowasi wulkak kumb wa odede rija na re Mose demb de wul kesa tunggind yipa girem yurowatonj girem ongi riga yilo okatam ra ton itemb girem yir ongi. ¹⁵ Nokim da idenat komkesa rigap yepiya ra gar ke utkunda oramisi Ti pilind, ton b'ogla yakate dadal ngirpu kesa yirkokar.

¹⁶ "God ma sobijog na gowukoi riga singi eyenionj, si onggit penaemb Ton Tina lesmita B'iga akainonj. Nokim da idenat komkesa riga yepiya ra Ti pilind gar ke utkunda oramisi, ton ma opima negir taukanj aji ton ita okasi dadal ngirpu kesa yirkokar. ¹⁷ I God Tina B'iga gowukoi riga wa pilwa yitmikitonj re ma gowukoi riga negir ma b'isagika mana, aji onggit mana da gowukoi rigap yirkokar okasi Tina wiko ke. ¹⁸ Si yete re Ti pilind gar ke utkunda yoramisi, ton ma ita ket negir ma b'isagika okas. Aji yete re maka

gar ke utkunda yoramis, ton re kea negir ma b'isagika okati e yibim. Mop nokip ti awir e gar ke utkunda oramiti yibnau Godimna lesmita B'iga, Tina nyiwim pilind. ¹⁹ Si itemb re negir ma b'isagika e. Si ngaya re kea ikonj onggit gowukoi wa. Aji rigap sibib e singi yiyenyi, aji ton ma ita onggityam ngaya singi yiyenyi nokip towaina mile re negirjog im wekeny. ²⁰ Komkesa riga yepim re negirjog mile amnikenenanj, ton onggit ngayam re bond im aukenenanj. Si ton ma opima onggit ngayam pilwa tuweny nokip ra ton ngaya wa tuweny, ton moga im da towaina negir mile ke pita wa raukinem. ²¹ Aji yepim re iminjog mile amnikenenanj, ton opima onggit ngayam pilwa tuweny, nokim da idenat ton towaina omniki mile tapekanj da onggityam towaina mile re God ma singind omniki im.”

Baptiso Yoaninma Yesum gatab Yir Ungata Yit

²² Onggit kak ke Yesu dide Tina b'auyaena riga wuwonj Yuda eriya wa. I Ton ademb de yipand gilgil wekenonj, i Ton ket riga baptiso amnikinonj. ²³ I Aion tungg re Salim tungg wus nat yibnonj, i demb de ma yipa kima nyi wimenapu na wekenonj. Si onggit penaemb Yoan toda kwa riga baptiso amnikinonj onggit tunggind. Si riga re kea wuwonj, dide ket baptiso yokateno. ²⁴ Mop nokip onggit winind rigap Yoanind maka sibibmet wa yoramito. ²⁵ Ninda Yoaninma b'auyaena riga yipa Ju riga kima yit b'ipatento Ju riga waina iseka mile gatab. ²⁶ I ton ket Yoanin pilwa tuwonj, i Yoanind yomno da, “Ouyaena Riga-wii! Yir de, itemb re riga yet re

man kima yibnonj Yordan kilim yipa tab wa, i re man Ti gatab yir ungata yit pita amneninot, Ton riga im baptiso amnikiny. Si jogjog riga im Ti pilwa wuweny.”²⁷ Si Yoan mira amninonj da, “Makwa yipa riga ririr e okas nanggamog gasa, aji b'ogla rada God ti okau.”²⁸ Si win b'ogla walenggyam kor gatab yir ungata yit tapurenindam rina re kon nindond da, ‘Kon ma Kerisoten aji Godit ken naska nitmikitonj, i ingkenaemb ket Ton ikonj.’²⁹ Ra yipa molkongga awowim mile tawik, itemb ji sisil kongga kima riga e yet ra kongga okas. I sisil kongga kima rigamna masar re ti wus nate onyiti ibim tin yim okawam. I ra masar tutkunj onggityam sisil kongga kima rigamna yitkak da, ‘Sin kea b'ogil molkongga i aya,’ ton ma sobijog gar sam e tainy. Si koda yipa wip emb onggityam gar sam ke yindangir auki nibnyin.”³⁰ Si itemb re riga Keriso b'ogla ukoi jog riga rain, aji kon b'ogla goujog riga rawin.”

³¹ I yet ra wub kumb ke ik, ton re ukoi jog riga e, aji komkesa gasa ra ti wira nasim tekeny. I yet ra gowukoi ke ik, ton re yipa gowukoi riga e. Si ton gowukoi gasa gatab im tapureniny. Si Keriso yet re pumb tungg ke ikonj, Ton re ukoi jog riga e aji komkesa gasa re Ti wira nasim wekeny.”³² Ton insim yir ungata yit apureniny rina re Ton yir anginonj dide utkundenonj. Aji makwa yipa rigat onggityam Tina yir ungata yit emjasiny.”³³ I riga yete re onggityam Tina yir ungata yit emjasiny, si tontemb tina garind tirir yominy da God re iminjog e.”³⁴ Mop nokip itemb Riga, Keriso yena re God yitmikitonj, Ton Godimna opureni yitkak im apureniny, nokip God Ti Yinayina Wingawinga

kupkakupka e yokaeneny. ³⁵ I Abu God onggit Ti B'igand singi e yiyeny, si Ton kea komkesa gasa Ti yimind aramisinonj. ³⁶ Si yet ra onggit B'igam pilind gar ke utkunda oramis, ton re dadal ngirpu kesa yirkokar kima e. Aji yet ra maka onggit B'igam pilind gar ke utkunda oramis, ton ma ita yirkokar okas. Aji ton God ma ukoi soro kima b'isagika wira nate yibneneny.

4

Yesu dide Yipa Samariya Tunggam Kongga

¹ I Parisai rigap kea utkundo odede da Yesu jogjog riga im Tina b'auyaena rigam amnikiny dide jogjog riga im baptiso amnikiny, aji Yoan re ma jog im. Si Yesu kea wumir yokatonj onggityam Parisai rigaina utkundeni yitkak gatab. ² Iminjog e da Yesu maka Tilenggyam yena baptiso amnikinonj aji Tina b'auyaena rigapiya. ³ Si Yesu Yuda eriya ke yiwatonj, i ket b'usaya Galili eriya wa itendonj. ⁴ I re Yesu Galili eriya wa itendam awonj, Ton kea God ma singind yisamkonj da Ton Samariya eriya nata e yik. ⁵ Si onggit penaemb Yesu yikonj de yipa taun wa Samariya eriya wingirind, ogenaya da Sikar. I Sikar taun re wus nat yibnonj onggityam goukipol ke rina re Yakob yokawonj ti b'iga Yosepim. ⁶ I demb de kea Yakobimna euki nyikip yibnonj. I Yesu nya pinpin imaeni map ji yarim awonj. Si re Ton onggit nyikip wusind isamlitonj, kea ket lomtik awonj.

⁷ I onggit winind ket yipa Samariya tunggam kongga tikonj nyi iskam. Si Yesu ket tin womnonj da, "Be ngai onayam nyi nokae!" ⁸ Mop

nokip onggit winind Yesumna b'auyaena riga re kea Yesund yiraro dide onggit taun wa wuwonj owou imdam. ⁹ I onggit winind Ju riga maka Samariya tunggam riga kima b'inkindenento. Si onggit penaemb itomb Samariya tunggam kongga Yesund yomnonj da, “Man re Ju riga et, i kon re Samariya tunggam kongga en. Si ridede ma pae Man ken nige kisit onaya nyiwim?” ¹⁰ I Yesu tin mira womnonj da, “Ra man wumir okasit nangga e God ma yiyag wurar, dide ra Ken notingwasit yete re Kon merkisin da ‘Onaya nyi nokae,’ manit rako Ken ner kisit i Kon keako mor mokaen yirkokar nyi.” ¹¹ I onggit konggat Yesund yomnonj da, “Si Mor awir e daka nyikak nyi iskam, i nyi re ma sobijog ngortod wa e yibim onggit nyikipind. Si onggit paemb, ringkae Man okasit onggityam yirkokar nyi?” ¹² Mera b'u Yakobit onggityam nyikip yeukonj, i tonjog, i tina b'igawar i dide tina ongeni b'angga onggit nyikip kena nyi yon-aikeneno. I ton ket itemb nyikip sowa nokain-onj. Si rika Man pumbjog riga et aji Yakob re goujog riga e?” ¹³ Yesu ket mira womnonj da, “Komkesa yepiya ra onggityam nyi onaikenenyi, ton opima b'usaya nyipa taukenenanj. ¹⁴ Aji yet ra onggityam nyi onai rinte ra Kon okaen, ton makwa ita ngai nyipa taukeneny. Aji onggityam nyi rina ra Kon okaen, ti pilind yipa kipnyi pila e tawik. Si onggityam nyi tobrureneny ra dadal ngirpu kesa yirkokar okawa ma.” ¹⁵ I onggit konggat Yesund yomnonj da, “Si be Man kor nokae onggityam nyi, nokim da idenat kon maka nyipa taukenenyin, dide idenat kon maka dikind nyi iskam netkenenyin.”

¹⁶ Si Yesu tin womnonj da, “Meke, i moleowind ara emoket, i dide ket titenjit dor dikind!” ¹⁷ I ket onggit konggat yismonggawonj da, “Kor awir e leo.” Seg Yesu tin womnonj da, “Si iminjog na man minjit da kor awir e leo. ¹⁸ Nokip mor paib (5) leo na mibnainonj. I kwa rinte re ket riga man kima yibim re ma mor leojog e. Si onggityam moina opureni yit re iminjog e.” ¹⁹ I onggit konggat ket windonj da, “Ukoyam! Kon ket yir mongen re da Man yipa bageyam et. ²⁰ Sin re Samariya tunggam riga im, i sowa b'uarip onggit Gerisim dor natemb Godind yewangaeneno. Aji win Ju rigap endenindam da inta yipaina pipmet Yerusalem taunind Godind ewangayam.” ²¹ Seg Yesu ket onggit konggand womnonj da, “Kongga! Gar ke utkunda ke nokate! Ita ji win ik. Ra onggit winind win ma ita B'und ewangaenena onggit Gerisim dorind o de Yerusalem taunind. ²² I win yewangaenena nangga im re win ma wumir im. Aji sin yewangaenenyu nangga e re sin wumir, nokip yirkokar okawa mile ik re Ju riga wa pilkae. ²³ Aji win ita ik. Si itemb ji yu win ridenasim ra iminjog ewangaya rigap B'und ewangaenenyi wingawinga ke dide iminjog yitkak ke. Mop nokip B'u odede Tinim ewangaya riga im oraka eyeniny. ²⁴ I God re Wingawinga e. Si Tinim ewangaya rigap b'ogla ewangaya yeyene wingawinga ke dide iminjog yitkak ke.” ²⁵ Si todaka ket onggit konggat Yesund yomnonj da, “Kon wumir en da Mesiya, ogenaya da Keriso, ita ik. I ra Ton ik, Ton ita komkesa gasa gatab mera tesipkeniny.” ²⁶ Si Yesu ket ti pita womnawonj da, “Kon intemb ji Riga yet re man kima yitnono aenyin.”

27 I onggit winind re Yesu onggit Samariya tunggam kongga kima yitnono aenonj, Tina b'auyaena riga itekto, i ket kid kesa na auto, nokip Yesu kea onggityam kongga kima yitnono aenonj. Aji makwa ngai yipa rigat yerkitonj da, “Nangga e Man yomniket?” o da, “Nangga pae Man ton kima yitnono aenyit?” 28 Seg ket onggit konggat omanda tina nyikak yiraronj, dide ket itendonj taun wa. I ton kea ket riga wumir amninonj da, 29 “Tuyim, i onggit Rigand yir ongongim yopa yete re ken wumir nomneny komkesa gasa gatab rina re kon amnikeneninond. Ma rika itemb re Riga, Kerisote?” 30 Si rigap taun ke yiwato, i ket Yesum pilwa tuwonj.

31 I onggit ganggand re riga maka opekto, Tina b'auyaena rigap Tin il yongko da, “Ouyaena Riga-wii! Be ngai diyam ae!” 32 Aji Yesu ten amninonj da, “Kor ita owou owowim rinsim re win ma wumir im.” 33 Si ket Tina b'auyaena rigap towalenggyam b'igekena wuwenonj da, “Ke yet owou Ti itiyau owowim?” 34 I Yesu ket ten amninonj da, “God Ken nitmikitonj Tina singi wiko omnikam dide undwatam. Si intemb ji Kornim owou. 35 Ma win endenindam da powa (4) mobi im komb i ingkaemb ket erngokam win ik dem? Aji Kon wen tamninyin. Win yir epangkinam dide ket yir ke injomkena teyenindam sopapu. Si kip re kea ungijog im erngokam. 36 I yete re kip erngoka eyeniny, ton re kea tina mira okati e yibim, si ton kip bobo omnika eyeniny de dadal ngirpu kesa yirkokar wa. Nokim da idenat tuny igmarka riga dide kip erngoka riga yipand gilgil

sam okasya. ³⁷ I rigap yipa yitkak opurena yiyenyi da, 'Yipa rigat tuny igmarka eyeniny aji b'enga rigat kip erngoka teyeniny.' Si onggityam yitkakit kea iminjog e yimjas onggityam mile gatab. ³⁸ I Kon wen tetmikisinyin ra kip erngoka mim rina re win maka bebig kima yir ipka eyentondam. Si ninda rigapiya bebig kima yir epkito, aji win kip erngoka teyenindam ra towaina bebig kima b'asowa wiko omniki sopapu kaim."

³⁹ I re onggit konggat Yesum gatab yir ungata yit b'usekonj da, "Ton kea wumir nomneny komkesa mile rina re kon amnikeneninond," onggit taun ke rigap kea tina yit utkundero. Si onggityam tina yit ke ma yipa kima Samariya tunggam rigapiya Yesund gar ke utkunda ke yokato. ⁴⁰ Si onggit penaemb ket ton Samariya tunggam rigap Yesum pilwa tuwonj, i ket Yesund yerkito ton kima towaina taunind wimenam. Si Yesu adea ket ton kima yibnonj nimog bibir kima. ⁴¹ I Yesu towa yitkak pitapita amnenainonj, si onggityam Tina yitkak kenaemb kwa b'usaya jogjog riga gar ke utkunda riga aukito. ⁴² Si ket rigap onggit konggand womno da, "Sin kea ket sowlenggyam Yesu ma yitkak utkundenindam dide sin ket wumir aindam da itemb riga re iminjog gowukoi riga wa yirkokar okawa riga e. Si onggit paemb sin ma ita ket Yesund gar ke utkunda ke okasu moina opureni yitkak ke."

*Yipa Ukoi Nyi Riga ma B'iga Isakendam
(Mat 8:5-13; Luk 7:1-10)*

⁴³ I nimog bibir kak ke Yesu Sikar taun ke yiwatonj de Galili eriya wa. ⁴⁴ Yesu Tilenggyam yir

ungata yit yindonj da, “Makwa ita yipa bageyamit riga wa pilke b'isnawa yokateny tinajog tunggind.”

⁴⁵ I re Galili tunggam riga Yerusalem taun wa wuwenonj Ju riga waina Uj Igwanti Nony Iyena Diyamdiyam okatam, ton ademb de komkesa mile yir angto rina re Yesu amnikinonj onggityam diyamdiyam winind. Si onggit penaemb re Yesu Galili eriya wa opendonj, Galili tunggam rigap Tin simesime yomno.

⁴⁶ I ket Yesu b'usaya Galili eriya wingirind Kana tungg wa yikonj rikind re Ton nyi ke ik yomnikonj. I onggit winind yipa kingimna ukoi wiko riga yibnonj Kaparnaum taunind, i tina b'iga re kopa na yibnonj. ⁴⁷ Si onggit riga ma b'iga re momta uj okata nat yibnonj. Si onggit penaemb re ton ket utkondonj da Yesu ke Yuda eriya ke ikonj de Galili eriya wa, ton kea ket Yesum pilwa yikonj. I ton ket yigekitonj menonim tina met wa dide tina b'iga isakendam. ⁴⁸ Yesu tin yomnonj da, “Ra maka ra win yir ongya Koina kid kesa kima danda wiko dide moga kima danda wiko, si win ma opima gar ke utkunda ke notkasya.” ⁴⁹ I onggit kingimna ukoi wiko rigat Yesund il yongkonj da, “Yonggyam! Koina b'iga momta e uj okas. Si wanaka nikya!” ⁵⁰ Si Yesu tin yomnonj da, “B'ogil e, man meke! Moina b'iga ke yilo yokas.” Seg onggit rigat ket Yesu ma yit gar ke utkunda ke yokatonj rina re tin yomnonj. Seg ingkenaemb ket ton yiwatonj. ⁵¹ I re ton menon yokatonj tungg wa, nyawind ninda tina wiko rigap tin wipwip yomno bage yit kima. Si ton ket tin wumir yomno da, “Mor b'iga ke yilo yokasim.” ⁵² Seg onggit ukoi wiko rigat win gatab ten arkisinonj da, “Ridenat kor b'iga b'ogil awim?”

Si ton ket tin wumir yomno da, “Sim nat juwarit tin yirarim simana wan (1) kilok gatab.” ⁵³ Si ti b'u kea ket wumir yokatonj da, “Onggityam yipaina win natemb Yesu ken yit nomnenyim da mor b'iga ke yilo yokas.” Seg ket ton dide komkesa riga Yesund gar ke utkunda ke yokato yepiya re tina metind wekenonj. ⁵⁴ I re Yesu Yuda eriya ke ikonj de Galili eriya wa, Ton nimogim onggityam kid kesa kima danda wiko na yomnikonj.

5

Kopa Riga Isakendam Betsaida Kipind

¹ I onggit kak ke re ket Ju riga waina diyamdiyam win awonj, Yesu Yerusalem taun wa yikonj. ² I yipa jambea pila kip, Ibru yit ke ogenaya da Betsaida, yibnonj Yerusalem taun wingirind de Mamoi B'igarenapu Mora wusind, i demb de paib (5) dir kesa met wekenonj. ³ I onggityam dir kesa met wingir nat b'engabenga kopa kima riga bobo wekenonj pasind opi re yirdidi riga, gomgom riga dide dimir kopa kima riga. [I ton onggit kipind nyi ulugaya win na yir yungaeneno. ⁴ Mop nokip yipa aneru kea win ke yikenenonj onggit kip wa, i ket ton nyi yulugaenenonj. Si nyi ulugaya kak ke yet ra naskajog nyi wa tisongg, ton ita tina kopa ke b'itisakenj nanggamog kopa e re ti yibnau.] ⁵ I ademb de yipa riga yibnonj yet re teti eit (38) kemag wingirind kopand yibnenenonj. ⁶ I re Yesu onggit rigand yir yongonj pasind, Ton kea wumir awonj da ton re ma yipa kima kemag na kopand yibnenenonj. Si Ton ket tin yomnonj da, “Ma man singi et b'isakendam?” ⁷ I onggit kopa rigat

Yesund mira yomnonj da, “Ukoyam! Kor awir e yete yim b'akawa riga nyi wa ken isonggam nyi ulugaya winind. Si kon ra il b'angka netkenyin nyi wa menonim, yipa rigat ita nitalngis de nyi wa menonim.”⁸ I Yesu ket tin yomnonj da, “Onyite, i ket moina dar yotokende dide ket menon yokate!”⁹ Seg odenja ket onggit rigat ket kopa ke b'isakendonj. I ton ket tina dar yotokendonj dide ket menon yokatonj.

I onggityam bibir re Ju riga waina wiram dide yir opmitena bibir na.¹⁰ Si onggit penaemb Ju rigap onggit kopa ke b'isakendi rigand yomno da, “Yu re meraina wiram dide yir opmitena bibir e. Si itemb re ma b'ogil omnika e ainy rinte re man moina dar yiyit.”¹¹ Aji ton ten mira amninonj da, “Onggit rigat yete re ken nisakenj, Tonit nominy da, ‘Moina dar yotokende dide menon yokate!’ ”¹² Si ton ket tin yerkito da, “Yetemb ji riga yete re men mominy da, ‘Dar yotokende dide menon yokate!’ ”¹³ Aji onggit kopa ke b'isakendi rigat maka wumir awonj yete Ton ji riga. Mop nokip Yesu kea onggit pipmet ke iimonj Ju riga bobo map.¹⁴ I onggit kak ke ket Yesu tin yodaronj yinametind, i Ton ket tin yomnonj da, “Man kea kopa ke b'isakendi et. Si goro kwa ngai negir mile tamnikinim, nokim da idenat ket makwa nangga negirjog mile tawik mor pilind.”¹⁵ I re onggityam rigat yiwatonj Ju riga wa pilwa, ton kea ket ten wumir amninonj da, “Itemb re riga Yesute yet re ken nisakenjim.”¹⁶ Si onggit penaemb Ju rigap Yesum pilind negir kima b'idgotnena mile yomniko, nokip Yesu onggityam mile yomnikonj re Ju riga waina wiram dide yir op-

mitena bibir nat. ¹⁷ Si Yesu ket ten mira amninonj da, “Kor B'u wiko omnika nata yibnikeneny ngirpu yu, si Koda kwa wiko nata nibnenenyin.” ¹⁸ Si Yesu ma ina Ju riga waina wiram dide yir opmitena bibir owama gatab mile nena na yerbekonj, aji daka kwa Ton Godind Ti B'ujogim yogenayonj. Si odede opurena kenaemb Tilenggyam God kima yipa ririrkip tondon b'akatenonj. Si onggit mop penaemb Ju rigap ma sobijog gar soro kima na nya oraka eyento Tin ongandam.

God ma Danda kima Riga Yesu

¹⁹ Si onggit penaemb Yesu ten mira amninonj da, “Kon iminjogjog wen tamninyin. B'uit nangga mile im re amnikiny, toda kwa Ti B'iga insima mile tamnikiny. Si onggit paemb rada B'igat maka ra yir tanginy nanggamog mile rinsim re Ti B'u omnika eyeniny, B'igat ma ririr e Tilenggyam nanggamog mile omnikam. ²⁰ Mop nokip B'uit ita Ti B'igand singi yiyeny, si Ton Ti B'igand komkesa mile youyaukuriny nangga im re Ton amnikeniny. I ma onggityam nena im youyaukuriny, aji Ton kwa Ti B'igam ukoijog mile im ouyaukuriny. Nokim da idenat win kid kesa tainindam. ²¹ Mop nokip ija emb ji B'uit uj riga utnikeneniny dide yirkokar agoneneniny. I odede yipa wip kaim daka B'igat riga wa yirkokar tagoneneniny yena ra Ton singi tamneniny okawam. ²² I ija emb ji kwa B'u makwa yena isagikam yomnenny, aji Ton komkesa isagika mile yoramitonj Ti B'igam pilnate. ²³ Nokim da idenat komkesa rigap onggit B'igand isnaenenyi odede wip rija im re ton Ti B'und yisnaenenyi. Yete re maka B'igand yisnaeny, ton kwa ma ita yisnaeny

Ti B'und yet re Tin yitmikitonj. ²⁴ I Kon kwa iminjogjog wen tamninyin. Yet ra Koina yitkak tutkunj i ra gar ke utkunda oramis Ti pilind yet re Ken nitmikitonj, ton kea yokas dadal ngirpu kesa yirkokar. I ton ma ita negir ma b'isagika okas dem, aji ton kea uj ke opantonj yirkokar wa. ²⁵ I kwa Kon iminjogjog wen tamninyin. Ita yipa win ik ridenat ra uj rigap Godimna B'iga ma nonykok utkundenyi, i utkunda riga yilo im taukanj. Si itemb ji yu win. ²⁶ Mop nokip B'u Ti pilnata yirkokar yowam, i ket onggityam yirkokar Ti B'igam yokawonj Ti pilind owamam odede rija e re Ti B'u yowam. ²⁷ I B'u kea Ti B'igam yokawonj b'isagika mile omnikam, mop nokip Ton re Rigamna B'iga e. ²⁸ Si win goro kid kesa taindam onggityam gatab, mop nokip yipa win ita ik dem, ra onggit winind gopmetind rigap tutkundenyi dem Tina nonykok. ²⁹ I yepiya re b'ogil mile amnikento, ton topekanj dem ra utnyita mim yirkokar wa, aji yepiya re negirjog mile amnikento, ton topekanj ra dem utnyita mim de negir ma b'isagika okatam.

Yesum gatab Yir Ungata Yit

³⁰ "I Kon makwa ririr en Kolenggyam nangg-amog mile omnikam. Si Kon b'isagika mile amnikeninyin ija ima ringma re Kon utkundenyi Godim pilke. Si Koina b'isagika mile re negir kesa dimdimjog e, mop nokip Kon ma Koina singi mile e oraka yiyenyin aji Tina singi mile e yet re Ken nitmikitonj. ³¹ I ra Konjogit yir ungata yit tapureninyin Kor gatab, onggityam Koina yir ungata yit re ma iminjog e. ³² Si ita yipa b'enga

riga yete re Kor gatabim yir ungata yit apureniny. I Kon wumir en da onggityam tina Kor gatab yir ungata yit re iminjog e. ³³ I win riga etmikurtondam Yoanim pilwa. Si Yoan ket yir ungata yit yindenonj iminjog yitkak gatab. ³⁴ Si Kon maka yir ungata yit yokatenyın yipa rigam pilke. Aji Kon onggityam yit apureninyın re, nok mim da idenat win yirkokar okasya. ³⁵ I itemb re riga Yoan re yipa lampa na rına re yimbeneonj dide b'anyoratenonj. Si win singi autondam sobijog ganggand onggityam tina ngaya pitand ukoi sam omnikam. ³⁶ Si Yoanimna yir ungata yit re ma ukoi e, aji Kor ita yipa ukoi jog yir ungata yit. I Kon insima wiko amnikenyın rına re Kor B'u nokainonj Kornim undwatam. Si onggityam Koina omniki wikopim Kor gatab yir ungata yit emjatenanj da Kor B'uit Ken nitmikitonj. ³⁷ I kwa B'u yet re Ken nitmikitonj, Tonitemb Kor gatab yir ungata yit yindonj. Aji win makwa ngai Tina nonykok yutkundonda, i kwa win maka Tina ji yir yongonda. ³⁸ I waina garind awir e kwa B'uimna yitkak yibim, mop nokip win makaya Ti pilind gar ke utkunda yoramisya yena re B'u yitmikitonj. ³⁹ I kwa win b'obogil im yina peba b'auyaena wuwenyit, mop nokip win nony aindam da win onggityam peba kaim dadal ngirpu kesa yirkokar yokatenya. Si onggityam yina pebapim Kor gatab yir ungata yit apurenanj. ⁴⁰ Aji win ma opima singi ainindam Kor pilwa menonim yirkokar okatam.

⁴¹ “I Kon ma ita riga wa pilke esourena yokatenyın. ⁴² Aji Kon wanım wumir ainyın da wa awir e kwa yibim Godım singi mile waina

garind. ⁴³ I Kon netkond re Kor B'u ma nyi kima na, aji win ma ita Ken nokatenya. Rada yipa riga tinajog nyi kima ik, si win ita onggit rigand okasya. ⁴⁴ Win opima walenggyam walenggyam esourena akatenenindam, aji win ma ita oraka yiyenya onggit b'ogil inyomarena rinte re yipaina nena God, Ti pilke ik. Si win ridede e Kor pilind gar ke utkunda oramisya? ⁴⁵ I win goro nony taininam da Kon wen opima b'isagikam taramisinyin Kor B'u ma kot wa. Si win opima Mosem pilind singi ainindam warim b'ogil isma okatam. Aji itemb Mose tontemb wen kot wa taramkiny dem b'isagikam. ⁴⁶ I ra win Mosend gar ke utkunda ke okasya, win kea Ken gar ke utkunda ke nokasya. Mop nokip ton gog yit peba erikinonj re Kor gatab na. ⁴⁷ Si ra win maka tina gog yit pebam pilind gar ke utkunda oramisya, si ridede im win Koina opureni yitkakim pilind gar ke utkunda oramisya?"

6

Paib Tausin (5,000) Riga Ongena Yit (Mat 14:13-21; Mak 6:30-44; Luk 9:10-17)

¹ I onggit kak ke Yesu Galili sipa tab wa giga nya ijendonj. I Galili Sipam kwa yipa nyi re Tiberiya Sipa e. ² Si jogjog riga bobop kea Yesund yimta yundoko, mop nokip ton kea kid kesa kima danda wiko yir angto rina re Ton kopa riga wa pilind amnikinonj. ³ Seg ket Yesu yipa dor ijonj. I demb de ket Tina b'auyaena riga kima omnikto. ⁴ I onggit winind Ju riga waina Uj Igwanti Nony Iyena Diyamdiyam Win re ma pin na ket awonj.

5 I re Yesu yir b'iskonj, Ton kea yir anginonj jogjog riga bobo menonind Ti pilwa. Si Yesu Pilipind yerkitonj da, “Rokasim men owou temjindam onggit riga bobo ongenam?” 6 Yesu Tilengyam kea wumir awonj da inte Ton omnik. Aji Ton onggityam yit yopulitonj re Pilipind otonkita mana. 7 I Pilip ket Yesund mira yomnonj da, “Ra ita rigap yipa kipol yipa kipol imda teyananj, wan tausin tu andred (1,200) Kina* ke imdi owou re towanim ma ririr im taukanj.” 8 I Tina b'auyaena riga wingirind yipa riga, Simon Petromna yinggan Andrea, todaka ket Tin yomnonj 9 da, “Ita yipa b'iga dikind. Si ton paib (5) sana nganja dide nimog sobijog kabum kima e yibim. Aji ridede im onggityam owou ke odede jogjog riga bobo tangenindam?” 10 I ket Yesu yindonj da, “Win riga wumir amninam omnikam!” I onggit pipmetind re rinyarinya met na yibnonj. Si re riga omnikto, rigajog nena agenkitore paib tausin (5,000) na, aji maka kongga dide b'iga agenkitore. 11 Seg ket Yesu sana nganja akasinonj dide ket Godind siteket yit yomnonj. Seg Ton ket riga wa agoninonj yepiya re omniki wekenonj. I Ton kwa ija na yipa wip nya ke kabum daka agoninonj towaina singi ririrind. 12 I re riga ngor aukito, Yesu Tina b'auyaena riga amninonj da, “Owou komb bobo amnikinam. Ke owou b'asommeninem.” 13 Seg ton kea owou komb yipand bobo amnikto riga wa pilke yepiya re onggityam paib (5) sana nganja auto, si ton re twelp (12) wat na yindangir amnikto. 14 I re

* **6:7:** Grik peband da “tu andred (200) Denari”. I yipa Denari re yipa wiko riga ma yipa bibir wiko mira na.

rigap onggityam kid kesa kima danda wiko yir yongo rina re Yesu yomnikonj, ton kea endento da, “Itemb re iminjog onggityam bageyamte yet ra ik onggit gowukoi wa.”¹⁵ Si onggit penaemb rigap yisamko menonim Yesum pilwa dide Tin danda kima usunatam, nokim da idenat Tin towa kingim omnyi. Aji Yesu kea towaina isamki mile wumir awonj, si Ton towa pilke itringendonj, i b'usaya Tinta yikonj de dor wa.

Yesu Nyi Tumind Ikonj

(Mat 14:22-23; Mak 6:45-52)

¹⁶ I re si imokonj, Yesumna b'auyaena rigap wuwonj de sipa wa. ¹⁷ I demb de yipa giga yibnonj. Si ton ket giga wa angurkito dide ket wuwonj sipa yipa tab wa de Kaparnaum wa. Re ket sibib awonj, aji Yesu maka wanaka ten adarinonj. ¹⁸ I onggit ganggand yipa ukoi depu rib ikonj dide ket ribit sipand wuro yowinkonj. ¹⁹ I ton karab ingaena eito re ama rika paib (5) o siks (6) kilomita pin na. I onggit winind Yesu ikonj sipa nyi tumind dide ket onggit giga wus wa awonj. Si re Tina b'auyaena rigap Tin yir yongo, ton kea moga aukito. ²⁰ Si Yesu ten amninonj da, “Kon ten. Goro moga tainam!” ²¹ I ton sam kima Tin giga wa angitam simesime yomno. Seg odenja ket giga ibekitonj Kaparnaum sipa yuru wa ritade re ton menonim aukito.

Yirkokarim Owou Yesu

²² Re Yesumna b'auyaena rigap onggit pipmet ke yiwato, riga bobo kea naska nata yir angto da yipaina nena giga na de yibnonj i Yesu maka onggit gigand angitonj Tina b'auyaena riga kima, aji Tina b'auyaena riga nenapiya yiwato. I ispari ke ket

ton opimemb riga bobo omanda wekenonj onggit pipmetind rikind re Yesu ten angeninonj sipa yipa tabind. ²³ I onggit winind ninda giga tuwonj Tiberiya ke, i ket ibekurto onggit pipmet wusind rikind re rigap onggityam sana auto rina re Yonggyam siteket yit yomnonj Godind. ²⁴ Si opimemb riga bobo yena re Yesu angeninonj, kea wumir aukito da Yesu dide Tina b'auyaena riga awir im de onggit pipmetind. Si ton ket giga wa angurkito rina re Tiberiya ke tuwonj, i ket Kaparnaum wa wuwonj Yesund orakam. ²⁵ I re ton Yesund yodaro yipa sipa tab wa, ton ket Tin yomno da, “Ouyaena Riga-wii! Ridenat Man metket dikind?” ²⁶ Si Yesu ten amninonj da, “Kon iminjogjog wen tamninyin. Win Ken oraka niyanya re ma onggit pae da win kea yir yongma kid kesa kima danda wiko aji onggit pae da win kea sana auromam dide ket ngor aukirromam. ²⁷ Goro win wiko tamnikinam onggityam owowim rinte ra titkik aji onggityam owou mana rinte ra dadal ibneneny dide tawameneniny dadal ngirpu kesa yirkokarind. Si Rigamna B'igasim wa tagoniny onggityam dadal yirkokar owou, nokip Abu God kea Ti pilind injati mal youtintonj.” ²⁸ Si ton ket Yesund yerkiti da, “Sin singi im Godimna wiko omniam. Si b'ogla nangga e sin omniku?” ²⁹ I Yesu ket ten mira amninonj da, “Iteb ji Godimna wiko da win gar ke utkunda oramisya Ti pilind yena re Ton yitmikitonj.” ³⁰ Si ket ton Yesund yerkiti da, “Si man nangga kid kesa kima danda wiko e omniket, nokim da idenat sin yir ongu dide ket gar ke utkunda ke motkasu? Si man nangga wiko e omniket? ³¹ Mera b'uarip owou awenento re mana na wul kesa tungg nata

odede ringma re peband iriki yibim da, ‘Mose pumb tungg ke owou towa agoninonj owowim.’”
³² I ket Yesu ten amninonj da, “Kon iminjogjog wen tamninyin. Ma Moset wa owou agoninonj pumb tungg ke. Aji Kor B'ute wa iminjog owou agoneneniny pumb tungg ke. ³³ Mop nokip intemb ji Godimna owou rinte re pumb tungg ke inik i gowukoi riga wa yirkokar ogona eyeniny.”

³⁴ Si ton Yesund yerkiti da, “Ukoyam! Onggityam owou sowa nogonenine!” ³⁵ I Yesu ket ten amninonj da, “Kontemb yirkokarim owou. Si yet ra Kor pilwa ikeny, ton ma ita ket owoupand ibim. I yet ra Kor pilind gar ke utkunda oramis, ton ita winind ma ita nyipa ibim. ³⁶ Aji Kon kea wen amninond da, ‘Win kea Ken yir nongima, aji win makaya gar ke utkunda ke nokasya.’ ³⁷ Komkesa riga rinsim re Kor B'u Kor nogoniny, ton opima Kor pilwa tuweny. I yet ra Kor pilwa ik, Kon makwa ngai ita eaukeny in bau wa. ³⁸ Mop nokip Kon pumb tungg ke netkond re ma Koina singi omnika mana, aji Tina singi omnika mana yet re Ken nitmikitonj. ³⁹ Si itemb ji Tina singi yet re Ken nitmikitonj da Kon goro kwa ngai yipa riga yedamkitawin komkesa riga wa wingirind rina re Kor B'u nokainonj. Aji Kon b'ogla ten rutnikinin dadal ngirpu kesa yirkokar wa kikitum bibirind. ⁴⁰ Mop nokip intemb ji Kor B'uimna singi da komkesa riga yepiya ra B'igand yir ongi dide gar ke utkunda oramis Ti pilind, ton b'ogla dadal ngirpu kesa yirkokar yakate. Si Kon opima ten tutnikinyin dem kikitum bibirind.”

⁴¹ Si onggit penaemb Ju rigap Yesum gatab yit

b'ebongnento, mop nokip Ton yindonj da, “Kon intemb ji owou rina re pumb tungg ke inkond.”
⁴² Si ton endento da, “Ma ite Yesu, Yosepim b'iga? Ma men ma wumir im Ti b'u ake Ti mog? Si ridede pae Ton yu yindeny da Kon netkond re pumb tungg kena?”
⁴³ I Yesu ket daka mira amninonj da, “Seg ke yit b'ebongnena wa wingirind!”
⁴⁴ Si makwa ngai yipa riga ririr e Kor pilwa ik, aji inta ra Kor B'u Kor wus wa yii yet re Ken nitmikitonj. I Kon kwa daka ita tin utnyisin dem kikitum bibirind.
⁴⁵ Si bageyam waina peband ija imemb ji iriki wekeny da, ‘Komkesa riga b'atouyaenanj Godim pilkaim.’ Si komkesa riga yepiya ra B'und yit utkundenyi dide b'atouyaenanj Ti pilke, ton opima Kor pilwa tuweny.
⁴⁶ Makwa ke yet B'und yir yongonj, aji Tonita yet re Godim pilke ikonj. Si Tonita Tinta B'und yir yongonj.
⁴⁷ Si Kon iminjogjog wen tamninyin. Yet ra gar ke utkunda riga ibim, ton kea dadal ngirpu kesa yirkokar yokas.
⁴⁸ Si Kon itemb yirkokarim owou.
⁴⁹ Wa b'uarip wul kesa tungg nata owou eyento re mana na, aji ton kea uj aukito.
⁵⁰ Itemb ji onggityam owou rinte re pumb tungg ke inik. Si yet ra onggityam owou ou, ton ma ita uj okas.
⁵¹ Kon itemb yirkokarim owou rina re pumb tungg ke ikonj. Si yet ra onggityam owou ou, ton dadal e yilo ibneneny. Si onggityam owou rinte ra Kon takainyin ra Koina mi e gowukoi riga wa yirkokar okawam.”

⁵² Si onggityam Yesu ma opureni yit mape-naemb Ju riga towalenggyam towa wingirind danda kima yit b'ugwatento da, “Ridede e onggit rigat mera notkainy Tina mi ongongim?”
⁵³ Si

onggıt penaemb Yesu ten amninonj da, “Kon iminjogjog wen tamninyin. Ra win maka Rigamna B'iga ma mi ongong iyenya dide maka Tina kus onaya iyenya, wa awir e kwa yirkokar wa pilind. ⁵⁴ I yet ra Koina mi ongong iyeny dide Koina kus onaya iyeny, ton kea dadal ngirpu kesa yirkokar yokas. I Kodaka ket tin utnyisin dem kikitum bibirind. ⁵⁵ Mop nokip Koina mi re iminjog owou e, i Koina kus re iminjog onaya nyi e. ⁵⁶ Si yet ra Koina mi ongong iyeny i Koina kus onaya iyeny, ton Kor pilnate yibneneny i Kodaka ti pilnate nibnenenyin. ⁵⁷ I yirkokarım B'u Ken nitmikitonj, si Kodaka B'uimna yirkokar nate yirkokar nibnenenyin. I odede yipa wip nya ke itemb riga yet ra Ken ongong nitiyeny, todaka Koina yirkokar nate yirkokar ibneneny. ⁵⁸ Intemb ji owou rina re pumb tungg ke inkonj. I onggityam owou re ma ija e it re mera b'uarip re awenento dide ket uj aukenento. Si yet ra onggityam owou oweneny, ton ita yirkokar ibneneny dadal ngirpu kesa.” ⁵⁹ Yesu onggityam yitkak apureninonj re Tina ouyaena nat de Ju riga waina yir opmitenapu metind de Kaparnaum wa.

Nında B'auyaena Rigap Yesund Yıraro

⁶⁰ I re Yesumna b'auyaena riga onggityam Tina ouyaeni yitkak utkundenno, towa wingirind jogjog rigap apurenento da, “Onggityam yitkak re seojog e okatam. Si yete ririr e Tin imjas?” ⁶¹ I Yesu kea Tilenggyam wumir yokatonj da Tina b'auyaena rigap re yit na b'ebongnento Ti gatab. Si Ton ket ten amninonj da, “Ma ke onggityam yitkakıt wen gar negir amnikiny? ⁶² Si ra win Rigamna B'igand

yir ongya dem pumb wa menonind ritade re Ton naskand yibnonj, ma win opima kwa gar negir taukindam dem? ⁶³ Yinayina Wingawingatemb ji Riga yete re riga wa yirkokar agoniny. Aji gowukoi rigaina dandat makwa ngai ririr e riga wa yirkokar takainy. Si yitkak rina re Kon wa apurenawainyin re Yinayina Wingawingam pilkaim dide yirkokar okawa mim. ⁶⁴ Aji wa wingirind ninda riga opima wekeny yepim re maka onggityam yitkak gar ke utkunda ke yokasi.” Yesu nangga pena odede yindonj re nokip Ton get ke wumir na riga yepiya ra maka gar ke utkunda oramisi i ringgit rigate Tin tib yii dem. ⁶⁵ I Yesu ket yit yismontonj da, “Si onggit mop penaemb Kon wen amninond da, ‘Makwa ngai yipa riga ririr e Kor pilwa ik, aji inta ra Kor B'u Kor notkau.’ ”

⁶⁶ Si onggit kak ke Tina b'auyaena riga wingirind jogjog rigap Tin kak yiyawo dide ket Tin yiraro. Seg ton ket makwa ngai b'usaya Ton kima menon yokateno. ⁶⁷ Si onggit penaemb Yesu twelp (12) itmikitijog riga arkisinonj da, “Ma wida opima singi aindam Ken iraram?” ⁶⁸ I Simon Petro Tin mira yomnonj da, “Yonggyam! Man dadal ngirpu kesa yirkokar yitkak kima et. Si ya pilwa im sin ket wuyin? ⁶⁹ I sin kwa gar ke utkunda ke yokatenyu dide wumir im da Man re Godimna Yinayina Riga et.” ⁷⁰ I Yesu mira amninonj da, “Ma ma Konit wen twelp (12) riga abagikinond? Aji wa wingirind yipa riga re negir wingawinga kima e.” ⁷¹ Yesu onggityam yit yindonj re Simon Iskariyotimna b'iga Yudasim gatab na nokip ton re twelp (12) riga wingirind yipa riga na dide tontemb

Tinim tibam tau dem.

7

Yesu dide Ti Yिंगganwar

¹ Onggit kak ke ket Yesu Galili eriya wingir nata yikenonj. Aji Ton maka singi awonj Yuda eriya wa menonim. Mop nokip Ju rigap Tin oraka yiyeno ongandam. ² I Ju riga waina Dikaramet Diyamdiyam Win re kea wus nat awonj. ³ Si onggit penaemb Yesund Ti yingganwarip yomno da, “Man b'ogla iwasit ingkek i meket Yuda eriya wa, nokim da idenat Moina b'auyaena rigap Moina kid kesa kima danda wiko yir ongong teyenanj rina ra Man tamnikinyit. ⁴ Mop nokip yet ra singi tainy tilenggyam pitapita awowim, ton makwa ita egiti wiko tamnikiny. Si ra Man onggityam wiko tamnikinyit, Man b'ogla Molenggyam pitapita tainyit gowukoi riga wa.” ⁵ Nangga mop pena Ti yingganwarip odede endento re, nokip ton maka Yesund gar ke utkunda ke yokato. ⁶ Si onggit penaemb Yesu ten amninonj da, “Kor makaya win ririrkip ainy menonim, aji wa menonim win re ipangendi e ebnau ita winind. ⁷ I gowukoi rigap makwa opima wen negir yir ke yir tangranj, aji ton opima Ken negir yir ke yir notngi, mop nokip Kon towa gatab yir ungata yit pitapita amneninyin da towaina mile re negirjog im. ⁸ Si win wuwe onggityam diyamdiyam win okatam. Yu Kon ma ita neken onggityam diyamdiyam win okatam, mop nokip Kor makaya onggityam win nitkau ririrkip awowim.” ⁹ Si onggityam yit seg ke ket Ton adea de yibnonj Galili eriyand.

10 I re Yesumna yingganwar wuwonj onggityam diyamdiyam win okatam, seg Todaka ket yimta yikonj aji Ton maka riga wa wipind pitapita aenonj aji egitenonj-a. 11 Si demb de onggityam Dikaramet Diyamdiyam Win natemb Ju rigap Yesund oraka yiyeno dide ket erkena yiyeno da, “Rote ji onggityam Riga?” 12 I jogjog riga bobo wingirind rigap Ti gatab ma sobijog na yit b'ebongnena wuwenonj. Si nindap apurento da, “Ton re b'ogil Riga e.” Aji kwa nindap apurento da, “Nayi, Ton jogjog riga im b'anyginena nya ke ugungatena eyeniny.” 13 Aji makwa ngai yipa rigat Ti gatab yit pitapita yommenonj riga wa wipind, mop nokip ton Ju riga waina mopyam riga na moga uwadto.

Yesu Ma Ouyaena Yinametind

14 I re ket onggityam Dikaramet Diyamdiyam Win inyinyind awonj, Yesu yinamet aba wa yikonj dide ket riga auyaeninonj. 15 I re Ju rigap Yesund yit yutkundeno, ton kea kid kesa aento dide ket b'igekento da, “Itemb Riga re sikil kesa riga e. Si ridede na Ton yina peba yit wumir yokatenonj?” 16 Si onggit penaemb Yesu ten mira amninonj da, “Koina ouyaena re ma Koina e, aji Tina e yet re Ken nitmikitonj. 17 I yet ra singi tainy God ma singi mile omnikam, ton ita ongwas onggityam Koina ouyaena gatab da onggityam re Godim pilkaim o minda Koinajog nony ke opurena im. 18 I yete re tinajog nony ke apureniny, ton oraka yiyeny re tilenggyam riga wa pilke esourena okata ma. Aji yete re nya oraka yiyeny b'ogil inyomarena okawam Godim pilwa yet re Tin yitmikitonj, Ton

re iminjog yit opurena riga e, i Ti pilind awir e kwa negir kima kaokao mile. ¹⁹ Si ke wa Mose gog yit akainonj? Wa wingirind awir e kwa yete gog yit yimta undokiny. Si nangga pae win oraka niyanya Ken ongandam?” ²⁰ Si riga bobop ket mira yomno da, “Man negir wingawinga ke okati et. Yete Men oraka miyeny ongandam?” ²¹ Seg Yesu ket ten mira amninonj da, “Kon yipa kid kesa kima danda wiko yomnikond. Si onggit paemb win komkesa kid kesa aena wuwenyit. ²² I Mose wa God ma obagendi tirir omni mal wugim ipka mile akainonj. (Onggityam mile re ma Mosem pilkena ikonj aji wa buwar wa pilkena.) Si onggit paimemb win waina b'iga God ma obagendi tirir omni mal wugim ipka mile amnikenenindam waina wiram dide yir opmitena bibir wingirind. ²³ Si win ma opima singi ainindam Mosemna gog yit erbekam. Si onggit paemb win wa b'igawar God ma obagendi tirir omni mal wugim ipka mile amnikenenindam waina wiram dide yir opmitena bibir wingirind. Si nangga paim win daka Kor pilwa soro aukindam nokip Kon yipa rigand kea kupkakupka yisakendond waina wiram dide yir opmitena bibirind. ²⁴ Win goro b'isagika mile tamnikindam gim ke yir ongong gasa ke, aji win b'isagika mile tamnikindam ra negir kesa dimdimjog b'isagika mile kena.”

Ma Yesu Keriso e?

²⁵ I re ninda Yerusalem taun rigap Yesund yit yutkundo, ton endento da, “Ma itemb ji riga yena re meraina mopyam rigap oraka yiyenyi ongandam? ²⁶ Si yir de, Ton pita kipind yit pitapita

amneniny riga wa wipind. Aji makwa yete Tin yit yomneny. Si ringma, ma ke mopyam rigap iminjog Tin yongwasi da itemb riga re Kerisote? ²⁷ Aji men wumir im da ra Keriso ik, makwa ita yete wumir okas ringkae ji Ton ik. Aji itemb re Riga men wumir im da ingkae ikonj.” ²⁸ Si onggit penaemb Yesu yinamet aband unena kima ouyaena eyeninonj odede da, “Si win wumir im Kornim. I win wumir im da ringkae Kon netkond. Si Kon ma Koinajog singi kena netkond. Aji God Ton re iminjog e yet re Ken nitmikitonj. Aji win ma wumir im Tinim. ²⁹ Aji Kon wumir en Tinim nokip Kon Ti pilkena netkond, i Tonit daka ket Ken nitmikitonj.” ³⁰ Si onggit penaemb ton oraka yiyeno Tin okatam. Aji makwa yipa rigat yim yoramitonj Ti pilind nokip Tina win re maka yokatonj. ³¹ Aji onggityam riga bobo wa wingirind jogjog rigap Yesund gar ke utkunda ke yokato. Dide ton ket endento da, “Ra ket Keriso ik, rika Ton ririr e tamnikiny odede jogjog kid kesa kima danda wiko ringmim re onggit Rigat amnikeniny? Ma ririr e.”

³² I Parisai rigap kea onggityam riga bobo waina Yesum gatab b'ebongnena yit utkundeno. Si ket yina mopyam si riga dide Parisai rigap yinamet wiko riga etmikurto Yesund yimind usunatam. ³³ Si onggit penaemb Yesu yindonj da, “Kon ma pinjog e nitibnyin win kima. I ket Kon titenjin Ti pilwa yet re Ken nitmikitonj. ³⁴ Si win ita Ken oraka nitiyanya dem aji win ma ita Ken notidarya dem. I dide kwa win ma ririr im menonim rokate ra Kon nitibnyin dem.” ³⁵ I re Ju riga waina mopyam rigap Yesund yit yutkundo, ton towa wingirind b'arkena wuwenonj da, “Itemb re riga ritama menonim

ainy, si idenat men maka Tin odaru? Ma Ton ama ta meraina wetaweta auki Ju riga wa pilwa menonim ainy Grik yit opurena kantri wingirind dide kwa Grik yitam riga ouyaenam? ³⁶ Nangga e ji onggit yitkakit yisipkis re Ton yinj da, 'Win ita Ken oraka nitiyenya dem aji win ma ita Ken notidarya dem. I dide kwa win ma ririr im menonim rokate ra Kon nitibnyin dem.' "

Yirkokar Okawam Obrulapu Nyi

³⁷ I onggityam Dikaramet Diyamdiyam Win wingirind kikitum bibir re ukoijog bibir na yibnonj. Si re onggityam kikitum bibir awonj, Yesu onyitonj dide ket unena kima yindonj da, "Yepiya ra nyipa tekeny, tuyim ayo Kor pilwa dide nyi onaikya! ³⁸ Yet ra Ken gar ke utkunda ke notkas, yirkokarim nyi opima kilim pila b'itkenanj tina gar ke. Si yina pebat daka odede wip emb yindeny." ³⁹ Si Yesu onggityam yit yindonj re Yinayina Wingawinga gatab na. Si yepiya ra Yesund gar ke utkunda ke okasi, ton ita okasi dem onggityam Yinayina Wingawinga. Aji onggit winind Yinayina Wingawinga maike gar ke utkunda riga kima yibnonj, mop nokip Yesu maka uj ke utnyita ke b'ogil inyomarena yokatonj.

⁴⁰ I re riga bobop onggityam yit utkundeno, si ninda rigap endento da, "Itemb ji iminjog onggityam bageyam e yena re God tirir yomnonj itmikitam." ⁴¹ I nindap endento da, "Itemb ji Keriso." Aji kwa nindap endento da, "Ridede e Keriso ik Galili eriya ke? ⁴² Ma yina pebat ija emb yindeny da Keriso ra pita tau dem Dawidimna kus kae, i Dawidimna tungg, Betleem kae ik dem?"

⁴³ Si onggit penaemb riga bobo Yesu map gangga b'akalkito. ⁴⁴ I ninda rigap singi na aukito Yesund yimind usunatam aji makwa yet Ti pilind yim aramisinonj.

Ju Riga Mopyam waina Gar ke Utkunda kesa Mile

⁴⁵ I re yinamet wiko rigap itekto yina mopyam si riga dide Parisai riga wa pilwa, ton ket ten egekitto da, “Win nangga pena Tin maka iya?” ⁴⁶ Si yinamet wiko rigap mira amnito da, “Makwa ke yet odede yit apureninonj Ton re dide.” ⁴⁷ Si onggit penaemb Parisai rigap todaka mira amnito da, “Ma ke Ton wen daka b'anyginena nya ke wip amniny? ⁴⁸ Rika ke yet mera wip iyoi riga wingirind o Parisai riga wingirind Tin gar ke utkunda ke yokas? Makwa yet. ⁴⁹ Si opimemb riga bobo re gog yit wumir kesa riga im dide ton re God ma sake okati riga im.” ⁵⁰ I towa wingirind yipa riga, Nikodemo yet re naskand Yesum pilwa yikonj, ton ten amninonj, ⁵¹ da, “Meraina gog yitit ija emb yindeny da men naska rigam pilke b'agenai yit takasindam dide ket wumir okasu nangga im re ton amnikiny. Si ingkaemb ket ti pilind negir ma b'isagika mile omniku. Ma si meraina gog yitit ija emb yindeny?” ⁵² I todaka tin mira yomno da, “Ma mada Galili kaet? Si man yina peba wa yir mekene! I man ita wumir okasit da makwa ita yipa bageyam ik Galili ke.”

(Ninda Grik peband awir e onggityam yit. Yoan 7:53-8:11.)

⁵³ [Seg ket rigap yiwateno towaina met yipayipa wa.

8

Gigir dide Yigyig B'iyena Mile Kongga gatab Yit

¹ Aji Yesu yikonj de Olib dor wa. ² I ispari ke re Yesu b'usaya sitawarjog yikonj de yinamet aba wa, komkesa riga bobo kea Ti pilwa wuwenonj. Seg Ton ket omitonj dide ket ten auyaeninonj. ³ I Ju riga waina gog ouyaena riga dide Parisai rigap yipa kongga wokato tina gigir dide yigyig b'iyena mile omnikand. Si ton ket tin yimind usunati wiyo dide ket wonyito riga bobo wa wipind. ⁴ I ton ket Yesund yomno da, "Ouyaena Riga-wii! Sin onggit konggand wokasu re onggit pipmet nat rikind re ton yipa b'enga riga kima gigir dide yigyig b'iyena mile yomnikya. ⁵ I gog yit wingirind Mose sin ningainonj odede kongga b'ogla gimokip ke idrikam uj tama na. Si Man nangga e mitinjit omnikam?" ⁶ Si ton odede yit opurena kenaemb Yesund yotonkeno, nokim da idenat ton ril odarai Tin kot wa oramitam.* Aji Yesu uwontonj dide ket Tina yimkak ke gowind erineninonj. ⁷ I re ton Yesund yigekenawayo, Yesu ket utnikonj dide ket ten amninonj da, "Wa wingirind yete man negir mile kesa riga man naska gimokip b'iske ti pilwa!" ⁸ Yit seg ke Ton b'usaya uwontonj dide ket gowind irikand b'aramitonj. ⁹ I re ton Tina yit utkundo, ton ket yipayipa itrangka wuwenonj

* **8:6:** Ra Yesu mira ominy da, "Gimokip ke uj ondrikya," si ton Tin kear kesa rigam omnyi. I ra Ton mira ominy tin itraram, ton Tin kot wa oramisi gog yit erbeka map.

nanyam riga naska i daka ket sisil riga. Ngirpu ket Yesu nena unyitonj, i itomb kongga toda re omanda wibnonj. ¹⁰ I Yesu utnikonj i ket tin werkitonj da, “Kongga! Ropim riga? Ma awir e yete mornim negir ma b'isagakam riga?” ¹¹ Si ton mira yomnonj da, “Yonggyam! Awir e kwa yete.” Si Yesu daka tin womnonj da, “Si b'ogil e, Kodaka ma ita mor pilind negir ma b'isagika omniken. Si man meke, dide ngirpu yu ke goro kwa ngai yipa negir mile omnikim!”]

Gowukoyim Ngaya Yesu

¹² I Yesu b'usaya riga amninonj da, “Kon re gowukoyim ngaya en. Si yet ra Ken yimta nutundok, ton makwa ita ikeny sibibind, aji ton ita okas yirkokarim ngaya.” ¹³ Si Parisai rigap Tin yomno da, “Man Moinajog gatab nate yir ungata yit apureninyit. Si Moina yir ungata yit re ma iminjog e.” ¹⁴ I Yesu ket ten mira amninonj da, “Nangga ma ji rada Kon Koinajog gatab nate yir ungata yit apureninyin, onggityam Koina yir ungata yit re iminjog e. Nokip Kon wumir en ringkena Kon netkond, i ritama Kon neken. Aji win ma wumir im ringkae Kon netkond o ritama Kon neken. ¹⁵ I win opima gim ke gowukoi rigaina mile ririrind riga wa pilind b'isagika mile amnikenindam, aji Kon makwa ngai ya pilnate b'isagika mile yomnikenenyin. ¹⁶ I ra Kon b'isagika mile omniken, onggityam Koina b'isagika mile re iminjog e. Mop nokip Kon ma Kenta e nibnyin, aji Kon nibnyin re Kor B'u kima e yet re Ken nitmikitonj. ¹⁷ Si waina gog yit wingirind ija emb ji iriki yibim da, ‘Ra nimog rigaina yir ungata yit yipa

ririr taya, si onggityam yir ungata yit re iminjog e.’ ¹⁸ Si Kon Kolenggyam re Koinajog gatab yir ungata yit opurena Riga en. I Kor B'u yet re Ken nitmikitonj, Todaka kwa Kor gatab yir ungata yit opurena Riga e.” ¹⁹ Si onggit penaemb ton Yesund yerkitoda, “Rokate Mor B'u yibim?” Si Yesu mira amninonj da, “Win ma wumir im Kornim i kwa ma wumir im Kor B'uim. Ra win Kornim wumir taindam, win kea kwa Kor B'uim daka wumir aindam.” ²⁰ I re Yesu riga ouyaenand yibnonj yinamet aband, Ton onggityam yitkak apureninonj re Godim wulkip oramkapu boks wus nat. Aji makwa yet Tin yimind yusunatonj, mop nokip Tina win re maka itkawonj.

Yesu ma Menon gatab Yit

²¹ I Yesu b'usaya ten amninonj da, “Kon ita tewaikisin, i win ita Ken oraka nitiyanya. Aji win opima waina negir milend uj taukindam. Si win ma ririr im menonim ritama ra Kon neken.” ²² Si onggit penaemb Ju riga waina mopyam rigap b'arkento da, “Ton nangga pae odede yindeny da, ‘Win ma ririr im menonim ritama ra Kon neken.’ Ma si onggit mop paemb yinj da Ton Tilenggyam e b'atnganj?” ²³ Seg Yesu ket ten amninonj da, “Win re gou ke riga im, aji Kon re pumb ke Riga en. Si win re onggityam gowukoi riga im, aji Kon re ma onggityam gowukoi Riga en.” ²⁴ Si onggit paemb Kon kea wen wumir amninyin da, ‘Win opima waina negir milend uj taukindam.’ Si ra win maka Ken gar ke utkunda ke notkasya da Kon Tonten, win opima waina negir milend uj taukindam.” ²⁵ Si onggit penaemb ton ket Yesund yigekito da, “Yetet Man?” Si Yesu ket ten mira

amnionj da, “Kon intemb ji Riga yet re otomapu ke wa opurena tetiyainyimin ngirpu yu. ²⁶ I Kon ma yipa kima gasa im awaminyin wa gatab opurenam dide negir ma b'isagika omniam. Aji yet re Ken nitmikitonj, Tina opurena re iminjog e. Si Kodaka insima gowukoi riga wa apurenawainyinin rina re Kon Ti pilke utkundeninond.” ²⁷ Aji ton ma wumir na da Yesu re Ti B'uim gatab im wumir ameniny. ²⁸ Si Yesu ten amnionj da, “Onggit winind ra win Rigamna B'iga urowasya, idenatemb win wumir okasya dem da Kon Ton ten, i Kon makwa ngai opima Koina nony ke gasa amnikeninyin aji Kon insima yipa ririrkip yitkak apureninyin rina re Kor B'u nouyaenonj. ²⁹ Si yet re Ken nitmikitonj, Ton re Kon kima e. I Ton ma ita Kenta nirareny, mop nokip Kon ita winind Tinim sam okawa mim gasa amnikeninyin.” ³⁰ I re Yesu onggityam yit apureninonj, jogjog rigap kea Tin gar ke utkunda ke yokato.

Iminjog Abraamimna B'iga

³¹ Si onggit penaemb Yesu Ju riga amnionj yepiya re Tin gar ke utkunda ke yokato da, “Ra win Koina yitkakim pilind tekenyit, win opima iminjog Koina b'auyaena riga taindam. ³² I win opima iminjog yitkak wumir taindam, si onggityam iminjog yitkakit ita wen tetringsiny.” ³³ Si ton ket Yesund mira yomno da, “Sin re Abraamimna kus ke b'iga im. I sin makwa ngai yipa winind yama na wiko riga aukitondam. Si Man ridede pae minjit da, ‘Win opima b'itrari riga taindam?’” ³⁴ Si Yesu ket ten mira amnionj da, “Kon iminjogjog wen tamninyin. Komkesa riga

yepiya ra negir mile tamnikenenanj, ton re negir milemna wiko riga im. ³⁵ Si yipa riga ma wiko riga ma ita dadal ibneneny ti yonggyamim metind, aji ti b'igata ton dadal ibneneny ti b'u ma metind. ³⁶ Si onggit paemb ra B'igat wen tetringasiny, win opima iminjog b'itrari riga taukindam. ³⁷ Kon wumir en da win re Abraamimna kus ke b'iga im. Aji win Ken oraka niyanya ongandam, mop nokip waina garind awir e kwa pipmet yibim Koina yitkak wimenam. ³⁸ Kon insim yitkak apureninyin rina re Kor B'u nouyaukinonj. Aji widaka insim gasa omnika eyenindam rina re win utkudentondam wa b'uim pilke.”

³⁹ Si ton Yesund mira yomno da, “Abraam re sowa b'u e.” Si Yesu daka mira amninonj da, “Rada win Abraamimna b'igawar im, win kako inaemb gasa omnika eyenindam rina re Abraam amnikeninonj. ⁴⁰ Si Kon wa insima iminjog yitkak apurenawainy in rina re Kon utkundeninond Godim pilke. Aji otade win Ken oraka niyanya ongandam. Si Abraam maike odede mile amnikeninonj. ⁴¹ Si win insima wiko omnika eyenindam rinsim re wa b'u omnika eyeniny.” Si onggit penaemb ton kwa Yesund yomno da, “Sin ma basa oraki b'iga im. Sowa yipaina b'u re Godta tinta.” ⁴² Si Yesu ket ten amninonj da, “Rako God wa B'u ebnau, kako win Ken singi niyanya, mop nokip Kon Godim pilkena netkond i itemb Kon ket dikind nibnyin. Si Kon ma Koina singi kena netkond, aji Tonit Ken nitmikitonj. ⁴³ Si nangga pae win maka nony aukindam Koina opureni yitkak gatab? Si nokpaim da win ma ririr

im Koina yitkak utkundam. ⁴⁴ Si win wa b'u, Satanam pilke riga im. Si win singi ainindam wa b'u ma singi mile omnika mim. Ton re otomapu ke riga onganda riga na yibnonj i ton maka onyitonj iminjog yitkakim pilind, mop nokip ti pilind awir e kwa iminjog yitkak yibim. I ra ton b'anyginena yit tapureniny, ton tinajog nony kaim apureniny, nokip ton re b'anyginena riga e i kwa ton re komkesa b'anyginena milem b'u e. ⁴⁵ Aji Kon re iminjog yitkak im apureninyin, si onggit mop paemb win maka Ken gar ke utkunda ke nokasya. ⁴⁶ I ita yete wa wingirind nitimjas da Kor ita negir mile? Si rada Kon iminjog yitkak im apureninyin, nangga pae win maka gar ke utkunda ke nokasya? ⁴⁷ Si yet ra Godimna riga tainy, ton ita Godimna opureni yitkak utkudena yikeny. Si itemb ji mop nangga pae win maka God ma yitkak utkundenindam, nokip win re ma Godimna riga im.”

Yesu dide Abraam

⁴⁸ Si onggit Ju rigap Yesund mira yomno da, “Sin nindenindam da, ‘Man re Samariya tunggam riga et yepim re Godim wumir kesa wekeny, dide Man negir wingawinga ke okati et.’ Si ma onggityam yit iminjog e?” ⁴⁹ Si Yesu mira amninonj da, “Kon ma negir wingawinga ke okati en. Si Kon Kor B'u na yisnaenenyin. Aji win ma ita Ken nisnaenenyanya. ⁵⁰ Kon ma Kornim b'ogil inyomarena e oraka yiyenyin. Aji ita ji yipa riga yete re Kornim b'ogil inyomarena oraka yiyeny dide riga isagika eyeniny. ⁵¹ Kon iminjogjog wen tamninyin. Yet ra Koina yitkak tawameneniny, ton ma ita uj yir ong dem dadal ngirpu kesa.” ⁵² Seg Ju rigap ket Yesund

yomno da, “Si yu sin pitakipind wumir yokasu da Man re negir wingawinga ke okati riga et. Abraam re kea uj awonj dide daka Godimna bageyam toda kwa kea uj aukito. Aji Man odede mindenyit da, ‘Yet ra Koina yitkak yimta undoka iyeny, ton makwa ita uj tainy dem dadal ngirpu kesa.’ ⁵³ Si rika Man ukoyam et, aji sowa b’u Abraam yet re uj awonj re ma amaya ukoyam e? I bageyam toda re kea uj aukito. Si Man ridede e Molenggyam b’agenaet?” ⁵⁴ Si Yesu ket ten mira amninonj da, “Ra Kon Kolenggyam Kornim b’ogil inyomarena takasinyin, onggityam Koina b’ogil inyomarena re kip kesa e. Aji ita Kor B’u yete re Kornim b’ogil inyomarena nogoneneniny. Si win Tinaemb yogenaya da, ‘Sowa God’.” ⁵⁵ I win ma wumir im Tinim aji Kon wumir en Tinim. I ra Kon nitinjin da Kon ma wumir en Tinim, si Kon re b’anyginena riga en win re dide. Aji Kon Tinim wumir en dide Tina yitkak im awameneninyin. ⁵⁶ I wa b’u Abraam re ma sobijog sam nat yibnikenenonj yir ungand Koina bibir yir ongongim. I ton ket kea yir yongonj dide ket sam awonj.” ⁵⁷ Si onggit penaemb Ju rigap Tin yomno da, “Man makaya pipti (50) kemag yokasit. Si ridede na Man Abraamind yir yongot?” ⁵⁸ Seg Yesu ket ten esmonggainonj da, “Kon iminjogjog wen tamninyin. Abraam re yimta kena ukendonj, aji Konitemb naska get ke nibnenenond.” ⁵⁹ Si onggit penaemb ton gimokip emdito Tin idrikam. Aji Yesu kea b’ulongkena yikonj dide ket yinamet bau wa opendonj.

Yirdidi Riga Isakendi Yit

¹ I re Yesu nya yimayonj, Ton kea yipa yirdidi ukendi riga yir yongonj. ² Si Tina b'auyaena rigap Tin yerkiti da, “Ouyaena Riga-wii! Yaina negir millet tin odede yirdidi ukendam yomnonj, mında tinajog negir millet o mında ti b'u ake ti mog waina negir millet?” ³ I Yesu mira amninonj da, “Ma tinajog negir millet o ma ti b'u ake ti mog waina negir millet tin yirdidi ukendam yomnonj. Aji ton yirdidi ukendonj re Godimna wiko pita omna mana ti pilind. ⁴ Yu men b'ogla Tina wiko ramnikinum yet re Ken nitmikitonj ngirpu ra ket bibir win b'utundwas. I siwiny ita ik. Si onggityam winind makwa yipa rigat ririr e wiko omnik. ⁵ Si ite re Kon gowukoyind nibnyin, Kon re gowukoyim ngaya en.” ⁶ Onggityam yit seg ke Yesu auya b'iskonj gou wa dide ket onggityam auya ke pam yomnikonj. Seg ket Yesu onggityam pam ke onggit riga ma yirkip esnikonj. ⁷ I Yesu ket tin yomnonj da, “Meke Silowam kip wa, i ket yirkip b'itiseket!” (Silowam engenda yitkak re “Itmikiti” e.) Si ton yiwatonj dide ket yirkip b'isekonj. Seg ton ket yir b'iskena yikonj tina met wa. ⁸ I re ti wuswusam rigap dide yepiya re naskand tin yir ongong yiyeno tina b'ijenena milend, ton tin isakendi yir yongo, ton kea b'igekento da, “Ma intemb ji riga yet re omi yibnenenonj b'ijenenam?” ⁹ Si nindap endento da, “Tontemb onggityam riga.” Aji kwa nindap da, “Nayi, aji ton re yipa ti wip pila riga e.” Aji onggityam isakendi riga tilenggyam b'agenayonj da, “Kon itemb ji riga.” ¹⁰ Si onggit penaemb ton tin yigekito da, “Si ridede na moina yirkip

b'ipangenjya?" 11 Si onggit rigat ten mira amninonj da, "Ite re riga ogenaya da Yesu, Tonit pam yomnik i ket onggityam pam ke koina yirkip esnik. I Ton ket ken ningau da, 'Meke de Silowam wa dide b'itiseket.' Si kon yiwasin i ket b'iseken, i ingkenaemb ket koina yir ipangenjya, i kon ket yir b'iskenyin." 12 Si ton tin yigekito da, "Rotemb ji onggityam Riga?" Ton mira amninonj da, "Kon ma wumir en."

13 Si rigap onggityam isakendi riga yiyo Parisai riga wa pilwa. 14 I onggityam bibir re Ju riga waina wiram dide yir opmitena bibir nat re Yesu pam yomnikonj dide onggit rigamna yir epangendonj. 15 Si onggit penaemb Parisai rigap todaka tin b'usaya yigekito da, "Ridede na man yir ipangenjit yir b'iskenam?" Si ton ten mira amninonj da, "Ton koina yirkipind pam yoramik. I kon ket b'iseken, i ingkenaemb ket yir ongongim aen." 16 Si onggit penaemb Parisai riga wingirind ket nindap endento da, "Ite re riga re ma Godim pilkae, nokip Ton maka meraina wiram dide yir opmitena bibir yowam." Aji kwa nindap endento da, "Ridede na negir mile kima rigat odede kid kesa kima danda wiko amnikiny?" Si ton ket gangga b'akalkito towa wingirind. 17 Si onggit penaemb ton b'usaya onggityam yirdidi rigand yigekito da, "Ton kea moina yirkip epangenj, si ridede e man Ti gatab mitinjit?" Si ton ket esmonggainonj da, "Ton re bageyam e." 18 Aji Ju riga waina mopyamip maka ti gatab iminjogim yomno da ton yirdidi riga na yibnonj i ket yir ipangik. Ngirpu ton ket onggityam yir ipangendi rigam b'u ake mog engauko. 19 I ton ket ten arkito da, "Ma waina b'iga e ji yena

re win yomnonda da yirdidi na ukendonj? Si ridede na yu ton yir ipangik?” ²⁰ Si ti b'u ake ti mog mira amninonda da, “Sin wumir i da ton re sowaina b'iga e, i ton yirdidi na ukendonj. ²¹ Aji sin ma wumir i ridede na ton yir ipangik o sin kwa ma wumir i yet tina yirkip epangenj. Mobe tin yerkena! Ton ke ukoi e. Si ton tilenggyam b'ogil e b'atgenai ti gatab.” ²² Si ti b'u ake ti mog onggityam yit endenonda re Ju riga waina mopyam moga mapena, mop nokip ton kea tirir yomno da yet ra pitapita ominy da Yesu re Keriso e, ton ita b'isagika mile okas eaukenam towaina yir opmitenapu met ke.* ²³ Si onggit mop penaemb ti b'u ake ti mog odede endenonda da, “Ton ke ukoi e. Mobe tin yerkena!”

²⁴ Seg ket ton nimogim yigekito onggit rigand yet re yirdidi yibnonj da, “Godim b'ogil inyomarena yokaene! Sin wumir im da itemb Riga re negir mileyam e.” ²⁵ Si ton mira amninonj da, “Kon ma wumir en rika Ton negir mileyam e. Aji kon inta yipaina wumir da kon re yirdidi riga na nibnond aji yu kon ket yir ipangendi en.” ²⁶ I ton ket tin yigekito da, “Nangga na Ton yomnik mor pilind? I ridede na Ton moina yirkip epangenj?” ²⁷ I ton ket ten mira amninonj da, “Kon kea wen wumir amninyin aji win maka nutkunja. Nangga

* **9:22:** Onggit winind Ju riga waina eaukena b'isagika mile ija naemb yibnonj. 1) Sobijog b'isagika mile: teti (30) bibir kima towaina yir opmitenapu met ke eaukitam, riga kima ma ita wuswus ibim. 2) Ukoi b'isagika mile: ogenka kesa win nate towaina yir opmitenapu met ke eaukitam, riga kima ma ririr e b'inkindenam. I rigap ma ririr e ton kima b'asoga mile omniam o tinim yii iyagikam tina uj gatab, tina ujjim gimokip ke idrikam

pae win b'usaya singi aindam utkundam? Ma si widaka singi im aindam Tina b'auyaena riga awowim?" ²⁸ Si ton ket negir yit ke tin yomno da, "Man re onggit Rigamna b'auyaena riga et. Aji sin re Mosemna b'auyaena riga im. ²⁹ Sin wumir im da God kea Mosend yit yommenonj aji sin ma wumir im itemb Riga ringkaemb Ton ikonj." ³⁰ Si ton ket ten amninonj da, "Si nangga pae, etama kima awik. Ton kea koina yirkip epangenj, aji win maka wumir aindam ringkae Ton ik. ³¹ Men wumir im da God ma opima negir mileyam utkundeniny, aji Ton utkundeniny re Tinim ewangaya riga im dide Tina singi omnika riga im. ³² Gowukoi otomapu ke ngirpu yu makwa ngai yipa rigat utkondonj da ke yipa rigat yirdidi ukendi riga ma yirkip epangendonj. ³³ Si rako itemb riga maka Godim pilke ikonj, Ton makwa rako ngai ririr na ainy nanggamog odede wiko omniam." ³⁴ Seg ton ket tin yismonggawo da, "Man kupka negir mile nat ukendot. Si man sin nouyaeninyit-a?" I ton ket tin yeaukeno bau wa.

³⁵ I re Yesu utkondonj da ton tin yeaukeno bau wa, Ton kea tin yodaronj. I Ton ket tin yomnonj da, "Ita man gar ke utkunda yoramisit Rigamna B'igam pilind?" ³⁶ Si ton mira yomnonj da, "Ukoyam! Yetemb ji Ton? Kon ita singi Ti pilind gar ke utkunda oramitam." ³⁷ I Yesu tin yomnonj da, "Si man ita Tin yir ongong yiyenyit. I Tontemb ji Riga yete re man kima yitnono aeny." ³⁸ I ton ket yindonj da, "Yonggyam! Kon ke gar ke utkunda yoramisin." Seg ton ket Yesum pilwa kumsos b'amkonj. ³⁹ I Yesu ket yindonj da, "Kon onggit

gowukoi wa netkond re b'isagika mile omnika mana, nokim da idenat yirdidi riga yir tepangkanj, aji yepim re yir ipangki wekeny, ton b'ogla yirdidi riga raukinem.”

⁴⁰ I Parisai riga wingirind ninda riga yepiya re wekenonj Yesu kima, ton kea onggityam yit utkundo. Si ton ket Yesund yerkitto da, “Si ma sida kwa yirdidi riga im?” ⁴¹ I Yesu ket ten amninonj da, “Si rako win yirdidi riga aukitondam, keako win maka negir mile kima na wekenyit. Aji yu win kea endenindam da sin yir ipangki im, si waina negir mile re opima wa pilind wekeny.”

10

B'ogil Mamoi Yir Ipka Riga Yesu

¹ “Kon iminjogjog wen tamninyin. Yet ra maka mora bora ke b'itgar mamoi kara wingir wa aji ra b'enga nya tatonkeniny ijenam, si itemb riga re yurowamam e dide raskol riga e. ² Aji yet ra mora bora ke b'itgar, ton re onggityam mamoi yir ipka riga e. ³ I ra mora yir ipka rigat mora ipangenj onggit mamoi yir ipka rigam b'igaram, mamoyip b'ogla tina nonykok utkunji. I ton tinajog mamoi yipayipa nyi tagenainy dide ton ket ten wip tamniny de bau wa. ⁴ I ra ton komkesa tinajog mamoi bau wa tapekiny, ton naska wa e tainy dide tina mamoyip ita tin yimta undoki, mop nokip ton wumir im tina nonykok. ⁵ Aji ton makwa ita ngai b'enga rigand yimta undoki aji ton ti pilke b'itkenanj-a, mop nokip ton ma wumir im onggityam b'enga riga ma nonykok.” ⁶ Yesu onggityam tendam yit ke ten amninonj aji ton

maka nony aukito nangga yit na re towa useka-wonj.

⁷ Si onggit penaemb Yesu b'usaya ten amni-nonj da, “Kon iminjogjog wen tamninyin. Kon re mamoi wa mora en. ⁸ Kon re yimtanyam en aji komkesa Ju riga waina wip iyoi riga yepiya re naska kana tuwonj, ton re yurowamam im dide raskol riga im. Si mamoyip maka ten yit utkundenento. ⁹ Kon re mora en. Si yet ra b'itgar onggityam mora bora nya, ton ita yirkokar okas. I ra ton b'itgareny dide topendeny, si odede menamenand ton ita b'ogil sal tib tadarkiny. ¹⁰ I yurowamam riga re ina nena ma ik it re da yurowamam i uj ondrikam i dide eomne-nam. Aji Kon onggit mana netkond da idenat mamoyip yirkokar okasi dide onggityam yirkokar kupkakupka inika yik. ¹¹ Kon re b'ogil mamoi yir ipka riga en. Si b'ogil mamoi yir ipka rigat tina yirkokar b'ogla oramis mamoi b'ogil omnam. ¹² Aji wulkip kima wiko riga re ma iminjog mamoi yir ipka riga e. I mamoi re toda ma tinajog im. Si ra di yonggik, ton mamoi terarkiny dide ket b'itkeny. Si onggit di yonggit mamoi tejgeniny dide ket teren-jainy. ¹³ Si nangga pae ton b'itkeny re nokip ton re wulkip kima wiko riga e, si ton ma iminjog singi kaim onggityam mamoi yir ipka eyeniny. ¹⁴ Kon re b'ogil mamoi yir ipka riga en. I Kon wumir en Koina mamoi, i todaka Koina mamoi wumir im Kornim. ¹⁵ I rija e re B'u Kornim wumir yibim, Kodaka kwa ija e Kor B'uim wumir nibnyin. Si Kon Koina yirkokar b'ogla oramis in onggityam Koina mamoi b'ogil omnam. ¹⁶ I God ma obagiki kesa riga toda re Koina mamoi im rinsim re maka onggit Ju

kus kara borand wekeny. Si Kon b'ogla teda kwa wip teyeninyin. I ingkaemb ton Koina nonykok tutkundenyi dide ket yipaina mamoi bobo tau-ranj. Seg ton ket yipaina mamoi yir ipka riga wirand tekeny. ¹⁷ I nangga mop pae B'u Ken singi niyeny re nokip Kon b'ogla Koina yirkokar ujind oramisin, nokim da idenat Kon b'usaya okasin onggityam yirkokar. ¹⁸ I makwa ita yipat onggityam yirkokar nitisas Kor pilke, aji Konte onggityam yirkokar ujind oramisin Koina singi ririrind. Si Kor ita danda onggityam yirkokar ujind oramitam i kwa kor ita danda b'usaya onggityam yirkokar okatam. Si Kon onggityam b'ingawa yokatond re Kor B'uim pilkena.”

¹⁹ I onggityam Yesu ma yit map Ju rigap b'usaya gangga b'akalento towa wingirind. ²⁰ Si towa wingirind jogjog rigap endento da, “Ton kea negir wingawinga ke okati e yibim, i ingkaemb korirkorir awik. Si nangga pae win Tin yit yutkundenya?” ²¹ I nindap daka endento da, “Onggityam opureni yit re ma negir wingawinga ke okati rigaina opurena im. Rika ririr e negir wingawinga ke okati rigat yirdidi riga ma yirkip tepangenj?”

Ju Rigap Yesund Yisayo

²² I Yinamet B'ogil Omna gatab Nony Iyena

Diyamdiyam Win* awonj Yerusalem taunind, i itemb win re gibil win nat. ²³ I Yesu yikenonj yipa dir kesa met nat ogenaya da, 'Solomonimna Met' yinamet kara wingirind. ²⁴ I re Ju riga tuwonj Ti pilwa, ton kea Tin yiwatinto. I ton ket Tin yomno da, "Ridede pin im Man sin nonysipsipind notowaminyit? Rada Man Kerisotet, Man sin pitakipind wumir nomnine!" ²⁵ I Yesu ket ten mira amninonj da, "Kon kea wen wumir omnena teyinyimin aji win maka gar ke utkunda yoramitenyima. Onggityam wiko rina re Kon amnikinyimin Kor B'uim nyi kima, tonpim Kor gatab yir ungata yit apurenanj. ²⁶ Aji win makwa ita gar ke utkunda yoramitenya, mop nokip win re ma Koina mamoi im. ²⁷ Koina mamoyip opima utkundenyi Koina nonykok, i Kodaka towanim wumir en. Si ton ita Ken yimta nutundoki. ²⁸ I Kontemb towa akainyin dadal ngirpu kesa yirkokar. Si ton makwa opima uj okasi dadal ngirpu kesa. I makwa ita yete ten tetringasiny Koina yim ke. ²⁹ I Kor B'u yet re onggityam mamoi Kor nokainonj, Ton re ukoi jog danda riga e aji komkesa re ma danda im. Si makwa yete ririr e ten tetringasiny Kor B'u ma yim ke. ³⁰ Kon dide Kor B'u, Sin re yipaina i."

* **10:22:** Re yipa Siriya kantri geja riga mopyam Antiyokus Epipanesit Yerusalem taun yokatonj B.C. wan andred siksti seben (167) kemagind, ton yinametind yipa towaina si omnikapu kap yoronganj dide ket nenegir nya ke si omnika yiyenenonj. Si onggit penaemb yipa Ju riga, Makabiyus, ton Ju riga wip eyeninonj dide ket Yerusalem towa pilwa yomno. Seg ton ket yinamet kilkesa yomnonj dide ket Godim yokawonj. Si Ju rigap onggit mile gatab nony iyenam diyamdiyam win yokateneno.

³¹ Si Ju rigap b'usaya gimokip emdito Tin idrikam. ³² Aji Yesu ket ten amninonj da, “Kon jogjog b'ogil wiko wa pita amnikainond rina re Kor B'u nokainonj omniam. Si onggityam wiko wingirind nangga wiko mop pae win singi aindam Ken gimokip ke idrikam?” ³³ I Ju rigap ket Tin yismonggawo da, “Ma onggityam b'ogil wiko mop pae sin gimokip ke Men idrikam momnyu, aji Moina Godind b'isadrena mile mop pae. Nokip Man re rigajog et aji Man Molenggyam God kima yipa ririr e awowim aenyit.” ³⁴ Seg Yesu ket ten mira amninonj da, “Ma waina gog peband ija e iriki yibim da, ‘Kon kea nindenond da win re god im wekenyit riga wa wipind’? ³⁵ Si God re kea onggityam riga ‘god’ ke agenainonj yepiya re Godimna yitkak yokateno. Si men wumir im da makwa yete ririr e yina peba yit awir ominy. ³⁶ Si onggit mop paemb Kon b'agenaen da, ‘Kon re Godimna B'iga en,’ nokip Godit Ken yina nomnonj i onggit gowukoi wa nitmikitonj. Aji win nangga pae odede nomnanya onggit gatab da, ‘Man kea b'isadrena mile yomniket’? ³⁷ I rada Kon ma Kor B'u ma wiko im amnikeninyin, si win goro gar ke utkunda ke notkata! ³⁸ Aji rada Kon opima amnikeninyin, win b'ogla gar ke utkunda ke nokata! Aji maka ra ririr ra, win b'ogla onggityam Koina omniki wiko gar ke utkunda ke akasinam! Si idenat win wumir okasya da B'u Kor pilnate yibim i Koda kwa Kor B'uim pilnata nibnyin.” ³⁹ Si onggit penaemb ton b'usaya Yesund oraka yiyo yimind usunatam. Aji Ton kea itringendonj towa pilke.

⁴⁰ Seg Yesu ket b'usaya yiwatonj Yordan kilim yipa tab wa. I Ton ket yikonj onggit pipmet wa rikind re Yoan naskand riga baptiso amnikeninonj dide ket ademb de yibnonj. ⁴¹ Si jogjog riga re kea Ti pilwa wuwenonj i ket endento da, “Yoan makwa ke yipa kid kesa kima danda wiko yomnikonj, aji komkesa yit rina re ton onggit rigam gatab apureninonj re iminjog na.” ⁴² Si ademb de onggit pipmetind jogjog rigap Yesund gar ke utkunda ke yokato.

11

Lajaromna Uj

¹ Yipa riga, nyi da Lajaro, kopa na yibnonj Betaniya tunggind rikind re Mariya ake ti wundoi Marta ebnonda. ² I intomb ji Mariya yet re Yonggyamim pilind ngirangngirang gaya yigmarkonj dide ket tina mopngii ke Yonggyamimna pis esekonj. I Lajaro yet re kopand yibnonj, ton re ti kimir na. ³ Si Lajaromna ngimir nimogip Yesum yit yitmitawonda da, “Yonggyam! Yir de, Moina singi iyeni riga ke kopa nate yibim.” ⁴ I re Yesu onggityam yit utkundonj, Ton yindonj da, “Onggityam kopa re ma uj okata ma aji Godimna b'ogil inyomarena pita omna ma. Si idenat onggityam kopa ke Godimna B'igat b'ogil inyomarena okas.” ⁵ Yesu kea nanyingganwar singi eyeninonj, Marta i ti wundoi dide Lajaro. ⁶ I re Yesu utkundonj da Lajaro kopa nate yibim, Ton maka yikonj aji omanda nimog bibir awamonj rikind re Ton yibnonj. ⁷ I onggit kak ke Yesu Tina b'auyaena riga amninonj da, “Men b'usaya Yuda

eriyā wa ritekinum!”⁸ Si Tina b'auyaena rigap Tin yomno da, “Ouyaena Riga-wii! Man rina pin mibnyimit re Ju rigap oraka miyeno gimokip ke idrikam? Aji nangga pae Man b'usaya itendam ainyit?”⁹ I Yesu ket mira amninonj da, “Yipa bibir winim, ma twelp (12) awa im pop? Si yet ra bibir winind menon okas, ton ma ita b'utuwombeny, mop nokip ton gasa pita nasim yir ongong eyeniny onggit gowukoyimna ngayand. Si Kon re ngaya en.¹⁰ Aji yet ra siwinyind menon okas, ton ita b'utuwombeny nokip ti ma ita ngaya.”¹¹ I onggit yit seg ke ket Ton kwa ten amninonj da, “Meraina riga Lajaro yit e weg. Aji Kon neken ra tin yit opmura ma.”¹² I Tina b'auyaena rigap Tin yomno da, “Yonggyam! Rada ton yit e weg, ton ita b'itisakenj.”¹³ Yesu Lajaromna uj gatab na yitnono aenonj aji Tina b'auyaena rigap ija na nony aukito da Ton iminjog yutunga gatab e yindeny.¹⁴ Si onggit penaemb Yesu pitakipind ten wumir amninonj da, “Lajaro ke uj awim.¹⁵ I Kon maka demb de nibnyimin. Si onggit paemb Kon sam e aen, nokim da idenat win gar ke utkunda ke notkasya. Si men b'ogla wowin ti pilwa!”¹⁶ Seg Toma ogenaya da Didimo ket ti b'auyaena rigamadwar amninonj da, “Si meda kwa wowin. Si idenat men uj taukindam mera Yonggyam kima.”

Yesu Marta kima Yitnono Aenonj

¹⁷ I re Yesu opendonj Betaniya tungg wa, Ton ket wumir yokatonj da Lajaro re kea powa (4) bibir kima na gimo yund oski gopmetind yibnonj.¹⁸ Betaniya tungg re ma pin na yibnonj Yerusalem taun ke, b'ogla ama rika nowa kilomita pin na.¹⁹ I

jogjog Ju rigap Marta ake Mariya adareno towa kimir Lajarom uj gatab omanam. ²⁰ I re Marta utkundonj da Yesu ke ik, si ton ket met ke yiwatonj Yesund wipwip omnam. Aji Mariya re adea met wa wibnonj. ²¹ Si Marta Yesund yomnonj da, “Yonggyam! Rako Man dikind mibnot, kor kimir ma rako uj awonj. ²² Aji yu kon kwa wumir en da ra Man Godind erkisit, God ita mira Mor motkau.” ²³ Si Yesu ket tin womnonj da, “Mor kimir ita tutnyis.” ²⁴ I Marta daka ket Tin yismonggawonj da, “Kon wumir en da ton ita tutnyis dem utnyita winind kikitum bibirind.” ²⁵ Si Yesu ket tin mira womnonj da, “Konten onggityam utnyita dide yirkokar. Yet ra Ken gar ke utkunda ke notkas, nangga ma ji rada ton ke uj yokas, ton ita yilo tainy. ²⁶ I riga yet ra yilo ibim i ra gar ke utkunda ke Ken notkas, ton makwa ngai ita uj okas dadal ngirpu kesa. Si ke man onggityam yitkak gar ke utkunda ke yokasit?” ²⁷ I ton ket Yesund mira yomnonj da, “Owi, Yonggyam! Kon kea gar ke utkunda ke mokasin da Man re Godimna B'iga Kerisotet, yet re ikonj onggit gowukoi wa.”

Yesu Mariya kima Yitnono Aenonj

²⁸ I onggit yit opurena kak ke, Marta yiwa-tonj met wa dide ket ti wundoj Mariyand musik yit wigiyawonj da, “Ouyaena riga ke ik, i men mingawik.” ²⁹ I re Mariya onggityam yit utkundonj, ton wanakana onyitonj i ket Yesum pilwa wikonj. ³⁰ Si Yesu re maka tungg wa menon yokatonj, aji Ton adea de onggit pipmetind yibnonj rikind re Marta Tin wipwip yomnonj. ³¹ I re

Mariya wanakana utnantonj dide met ke yiwa-tonj, si Ju riga rina re ton kima wekenonj metind dide ti pilwa omanam wuwenonj, ton kea tin yir wongo. I ton ket tin yimta wundoko odede nony kima da ton gopmet wa e wik demb de yii iyagikam. ³² I re Mariya opendonj rikind re Yesu yibnonj, ton Yesumna pis wipind eobankonj. I ton ket Yesund yomnonj da, “Yonggyam! Rako Man dikind mibnot, kor kimir ma rako uj awonj.” ³³ I Mariya kea yii b'irinenonj dide Ju riga yepiya re ton kima tuwonj, toda kwa yii b'irinento. Si re Yesu ten yir anginonj yii b'irinenand, Ton onggityam towaina yii b'irinenana map ma sobijog na gar soro awonj dide Ton ket nony bebig awonj. ³⁴ Si Yesu ten amninonj da, “Rokate tin yoramitonda?” I ton ket mira yomno da, “Yonggyam! Si wuyin i Man ita yir onget.” ³⁵ Si Yesu ket yirekip yikenonj. ³⁶ Si onggit penaemb Ju rigap endento da, “Wii, yir de. Ma Ton ma sobijog na tin singi yiyenonj?” ³⁷ I kwa towa wingirind ninda rigap endento da, “Onggit rigat kea yirdidi riga ma yirkip epangendonj. Si nangga pena Ton maka yogokonj tin uj okatam?”

Yesu Lajarond Yutnyitonj

³⁸ I re Yesu onggityam yit utkundonj, Ton b'usaya gar soro aukonj dide ket onggit gar soro kima gopmet wa yikonj. I gopmet re dorind eski na yibnonj ukoi gong bora pila dide ukoi gimo ke mora utwangki na yibnonj. ³⁹ Seg ket Yesu riga amninonj da, “Gimo itemb mora ke yururkita!” Aji onggityam uj riga ma ngimir Marta Tin yomnonj da, “Yonggyam! Ton kea powa (4) bibir kima e

yibim. Si ke kuka e yikeny.” ⁴⁰ Si Yesu tin womnonj da, “Ma Kon ke pop wumir momnyin da ra man gar ke utkunda oramisit, man ita yir onget Godimna b'ogil inyomarena?” ⁴¹ Seg ton ket gimo yururkito. I ket Yesu yir pumb wa awonj dide ket yindonj da, “Abu! Kon siteket yit momnyin nokip kea Man Ken nutkunjit. ⁴² Kon wumir na da Man ita win nate Ken nutkundernyit. Aji Kon onggityam yit nindenyin re onggit riga bobo mapae yepim re owinki wekeny dikind. Nokim da idenat ton gar ke utkunda oramisi da Manit Ken nitmikidot.” ⁴³ I onggit yit opurena seg ke Yesu unena kima ara yikenonj da, “Lajaro! Bau wa opende!” ⁴⁴ Si re uj riga bau wa opendonj, tina pis dide yim re kobirgim isetiki ke ijobiki na dide kwa tina wip re kobirgim kib ke ijobiki na wekenonj. Si Yesu ket ten amninonj da, “Kobirgim yotogika! I ti nya yispawa menonim!”

Yesund Ongandam Yisamko

(Mat 26:1-5; Mak 14:1-2; Luk 22:1-2)

⁴⁵ Si opimemb Ju riga yepiya re wuwenonj Mariyam pilwa, ton kea mile yir angto rina re Yesu amnikinonj. Si towa wingirind jogjog rigap kea Yesund gar ke utkunda ke yokato. ⁴⁶ Aji towa wingirind nindapiya yiwato Parisai riga wa pilwa, i ket ten wumir amnito nangga na Yesu amnikinonj. ⁴⁷ Si onggit penaemb yina mopyam si rigap dide Parisai rigap Ju riga waina Sanedrin kot b'eoma ara yemoko. I ton ket b'arkitto da, “Onggit Rigat kea jogjog im kid kesa kima danda wiko amnikiny. Si nangga e men Ti gatab omniku?” ⁴⁸ Ra men Tin nony ojasu odede wiko omnikand,

komkesa rigap opima Tin gar ke utkunda ke okasi dide ket Tin yimta undoki. I ingkaim ket Roma mopyam rigap towaina geja riga kima tui dem i ket meraina yinamet eomnenyi dem dide kwa meraina Ju yitam riga teomnenanj dem.”⁴⁹ I towa wingirind yipa riga Kayapa yet re yina mopyam si riga yibnonj onggit kemagind, ton ten amninonj da, “Win makwa wumir im wekenyit.⁵⁰ Si win ma wumir im b'ogil nya orakam onggityam bebig awir omnam. Si itemb re b'ogiljog e wanim da yipa rigat uj okas komkesa meraina Ju riga map dide idenat kwa meraina kupka yitam riga maka b'eteomnenanj.”⁵¹ Si ton onggityam yitkak yopulitonj re ma tinajog nony kena. Aji ton onggit kemagind yina mopyam si riga na yibnonj, si ton bage yit na yindonj da, “Yesu ita uj okas Ju yitam riga map.⁵² I ma Ju yitam riga nena mapae, aji kwa onggit mapae da Ton yipand teomkuriny Godimna b'iga yepim re Tina obagiki kesa riga wetaweta auki wekeny b'enga kantri nata.”⁵³ Si onggit bibir natemb ton yisamko Yesund ongandam.

⁵⁴ Si onggit penaemb Yesu maka pitakipind yikenonj Ju riga wa wingirind. Aji Ton ingkenaemb ket yiwatonj onggit taun wa ogenaya da Epraim. I Ton ket ademb de yibnonj Tina b'auyaena riga kima. Si itemb eriya re wul kesa tungg wus nat yibnonj.

⁵⁵ I Ju riga waina Uj Igwanti Nony Iyena Diyamdiyam Win wus wa na auka ikonj. Si yimta kena onggityam diyamdiyam win awonj, aji ninda eriya ke jogjog riga kea naska nata wuwenonj Yerusalem taun wa towanim iseka mile omniam.⁵⁶ Si ton Yesund oraka yiyeno i ket yinamet aband

owinki b'arkena wuwenonj towa wingirind da, “Win rija im nony aindam? Ita Ton ik onggityam diyamdiyam win okatam?”⁵⁷ Aji yina mopyam si rigap dide Parisai rigap kea odede b'ingawa yit yoramito da yet ra wumir okas da indama Yesu dikind yibim, ton b'ogla ten wumir tamniny Tin yimind usunatam.

12

Mariya Yesund Gaya ke Yeaukonj (*Mat 26:6-13; Mak 14:3-9*)

¹ I re siks (6) bibir komb aukito Ju riga waina Uj Igwanti Nony Iyena Diyamdiyam Win awowim, Yesu kea Betaniya tungg wa opendonj. I Lajaro yena re Yesu uj ke yutnyitonj, ton ademb de onggit Betaniya tunggind yibnonj. ² I demb de onggit tunggind ninda rigap kea Yesund ingaukam owou yongonjeno diyamdiyamim. Si Marta re owou na yingg eyeninonj. I Yesu ninda riga kima na owoupund omi yibnonj, i Lajaro re kea de onggit riga wingirind yibnonj. ³ I Mariya ukoi mira kima kilkesa ngirangngirang gaya ogenaya da nad yokatonj ama rika yipa lita na. I ton ket Yesumna pisind yigmarkonj dide ket tina mopngii ke Yesumna pis esekonj. Si met re kea onggit b'ogil gaya ngirangit yiwintonj. ⁴ Aji Tina b'auyaena riga wingirind yipa riga, Yudas Iskariyot yet ra Tin tib yii dem, ton yindonj da, ⁵ “Rako man onggityam ngirangngirang gaya yosogot, man keako akasinot wan tausin eit andred (1,800) Kina* dide ket ag-

* **12:5:** Grik peband da “tri andred (300) Denari”. I yipa Denari re yipa wiko riga ma yipa bibir wiko mira na.

oninot gasa kesa riga wa. Si nangga pena man maka odede yomnikot?” ⁶ I ton odede yindonj re ma onggit manaemb ji da gasa kesa riga yim okawam. Aji nok mana da ton re yurowamam na yibnonj. Si ton re rigaina oramki wulkip yir ipka riga na yibnonj, i ton kea onggityam wulkip wingirind ninda tinim emdeneninonj. ⁷ Si Yesu ket tin yomnonj da, “Tin wirare! Si ton onggityam mile yomnik re Kornim naskanaska eungita mile omnika ma. ⁸ Si gasa kesa riga opima win kima wekeneny ita winind, aji Kon ma ita ita winind win kima nitibnenenyin.”

⁹ I re ukoi Ju riga bobop wumir yokato da Yesu adea de onggit metind yibnonj, ton kea Yesum pilwa wuwenonj. I ton ma Yesu nena na yir ongongim yopeno, aji tida kwa Lajarond yir ongongim yena re Yesu uj ke yutnyitonj. ¹⁰ Si ket yina mopyam si rigap kea Lajarond tida kwa yisamko ongandam. ¹¹ Mop nokip Lajaro mapjogjog Ju riga Yesum pilwa wuwenonj dide ket gar ke utkunda ke Tin yokato.

*Yesu ma B'igaram Yerusalemind
(Mat 21:1-11; Mak 11:1-11; Luk 19:28-40)*

¹² I ispari ke ukoi riga bobo yepiya re onggityam diyamdiyam win okatam wuwenonj Yerusalem taun wa, ton kea utkundento da Yesu ke nya nate ik Yerusalem taun wa. ¹³ Si ton ket apig kima opekto Yesund simesime onnam. I ket auwam kima aento da,

“Osanna! Ita God ma b'ogil Man kima yete re Yonggyamimna nyi kima ik, ite re Israel riga wa king.”

¹⁴ I re Yesu yipa dongki b'iga yodaronj, Ton kea angitonj onggityam dongki b'iga kumbind. Si onggit gatab re yina peband ija emb ji iriki yibim da,

¹⁵ “Goro moga Siyon ngimngai!†

Yir de, moina king ite ik

omiti dongki b'iga kumbind.”

¹⁶ Naskand Yesu ma b'auyaena riga maka nony aukito onggit gatab. Aji yimta kena re Yesu uj ke utnyitonj dide ket b'ogil inyomarena yokatonj, ton kea nonyik b'amdito da onggityam yitkak iriki wekeny re Ti gatab im, si onggit penaemb rigap odede mile amnikto Ti pilind. ¹⁷ I onggit winind re Yesu Lajarond ara yemokonj gimo yiund oski gopmet bau ke dide ket tin uj ke yutnyitonj, riga bobo re kea Yesu kima wekenonj. Si onggit riga bobopiya Lajarom gatab yir ungata yit usenena yiyeno. ¹⁸ Si onggit mop penaemb riga bobop Yesund simesime omnam yopo nokip ton kea utkundeno onggityam kid kesa kima danda wiko gatab rina re Ton yomnikonj. ¹⁹ Si onggit penaemb Parisai rigap towa wingirind endento da, “Yir de, komkesa onggit gowukoi rigap re kea Tin yimta yundoki. Si mera awir e kwa nangga e omnikam awik.”

Ninda Grik Rigap Yesund Yodaro

²⁰ I re riga tuwonj Yerusalem taun wa Godind ewangayam onggityam diyamdiyam winind, si ninda Grik riga toda kwa kea de wekenonj onggit riga wa wingirind. ²¹ I opimemb Grik riga tuwonj Betsaida tunggam Pilipim pilwa yet re ikonj Galili

† **12:15:** Siyon ngimngai re Yerusalem Riga wanim yipa oeneni nyi na yibnonj.

eriyā ke. I ket ton tin yigekito da, “Sowa riga! Sin singi im Yesund yir ongongim.” ²² Ngirpu ket Pilip yikonj Andream pilwa dide tin wumir yomnonj. Seg ket Andrea ake Pilip ekonda Yesum pilwa dide ket Tin wumir yomnonda. ²³ Si Yesu ten ket esmonggawonj da, “Itemb ke win ik Rigamna B'iga b'ogil inyomarena okatam. ²⁴ Kon iminjogjog wen tamninyin. Ra yipa kini tuny maka tisenj gou wa dide ra maka uj tainy, itemb tuny re tinta e ibim. Aji ra itemb tuny uj tainy, ton jogjog kip im tejagikiny. ²⁵ I yet ra tina yirkokar singi iyeny, ton ita onggityam tina yirkokar edamkis dem. Aji yet ra tina yirkokar singi kesa ominy onggit gowukoyind, ton ita onggityam tina yirkokar yirgong omnikeneny dadal ngirpu kesa yirkokar wa. ²⁶ I yet ra Kornim wiko omnika iyeny, ton b'ogla Ken yimta nundok. Si rokate ra Kon nitibnyin dikind, toda indama onggityam wiko riga ibim Kon kima. Si yet ra Kornim wiko omnika iyeny, Kor B'u ita tin isnaeneny.

²⁷ “Otade Kon kid e b'ipokenyin, si nangga e Kon nitinjin? Abu! Be onggityam win ke Ken nitringate! Nayi, Kon onggit mop penaemb netkond itemb win okatam. ²⁸ Abu! Man Moina nyiwim pilind b'ogil inyomarena yoramitene!” I onggit yit seg ke ket wub kumb ke yitpiam ikonj da, “Kon kea b'ogil inyomarena yoramitenyinyin, i Kon ita b'usaya oramitenenyinyin.” ²⁹ I re riga bobop owinki onggityam yitpiam utkundo, ton endento da, “Iara e ara yikeny.” I kwa nindap da, “Anerute Tin yitnono yomneny.” ³⁰ Si Yesu yindonj da, “Onggityam yitpiam re ma Kor mana awik aji wanim b'ogil mana. ³¹ Si yu ite re onggit

gowukoyim b'isagika win e. Si yu Godte onggit gowukoyimna wip iyoi riga, Satanand b'itiskanjis bau wa. ³² I ra Kon gou ke b'uturowasin, Kon ita komkesa riga Kor pilwa tugungasinyin dem.” ³³ Si Yesu onggityam yit yindonj re ouyawa mana da ridede wip nya kae Ton uj okas dem. ³⁴ Si riga bobop Ton yigekito da, “Sin gog yit ke utkundernyu da, ‘Keriso ra dadal ngirpu kesa e ibneneny.’ Si nangga pae Man mindenyit da Rigamna B'igat b'ogla b'uturowas? Si yetemb ji onggityam Rigamna B'iga?” ³⁵ Seg Yesu ket ten esmonggainonj da, “I ma pin e ngaya ibim wa wingirind. Si win b'amana wuwene onggit ngaya pita winind. Nokim da idenat sibibit maka wen tekanginjiny. Si yet ra sibibind menon okas, ton ma wumir e ritama ton yik. ³⁶ Si onggit ngaya pita nat win gar ke utkunda yoramita onggit ngayam pilind, nokim da idenat win ngayamna b'iga taukindam.”

Ju Riga waina Gar ke Utkunda kesa Mile

I re Yesu onggityam yit opurena seg awonj, Ton towa pilke yiwatonj egitam. ³⁷ I Yesu kea onggityam komkesa kid kesa kima danda wiko amnikeninonj riga wa wipind. Aji ton maka Tin gar ke utkunda ke yokato. ³⁸ Nokim da idenat bageyam Isayamna onggityam yitkak ririrkip tainy. Si ton odede na yindonj da,

“Yonggyam! Yet sowaina bage yitim pilind gar ke utkunda yoramis?

I kwa ke ya pilnat Yonggyamimna danda yim pita ainy?”

39 I onggit mop penaemb ton maka ririr aukito gar ke utkunda, nokip Isaya b'usaya odede kwa yindonj da,

40 “God kea towaina yirkip yirdidi amnikinonj,
i towaina gar edokinonj.

Nokim da ke ton yir ongong reyeninem towaina yirkip ke,
i ke ton towaina gar ke repindeninem

dide ket ke ton rengenjinem Kor pilwa,
i dide ket ke Kon ten resakenjinin.”

41 Si onggit mop penaemb Isaya onggityam yit yindonj nokip ton kea Yesumna b'ogil inyomarena yir yongonj, si ton Ti gatab na wumir amninonj.

42 Si Ju riga waina memba wingirind jogjog riga toda kwa kea Yesund gar ke utkunda ke yokato. Aji ton maka towaina gar ke utkunda gatab pitapita ammento Parisai riga map. Nokip ton onggityam gatab moga na auto da Parisai rigap ke towaina yir opmitenapu met ke ten reaukeninem. 43 Mop nokip opimemb memba ukoi jog singi aento re riga wa pilke esourena okata mana aji ton ma ukoi singi na aento Godimna b'ogil inyomarena okatam.

44 Si Yesu ket unena kima yindenonj da, “Yet ra gar ke utkunda ke Ken notkas, ton ma Kena gar ke utkunda ke notkas aji Tina yet re Ken nitmikitonj. 45 I yet ra Ken yir noting, ton kea Tin yir yong yet re Ken nitmikitonj. 46 I Kon onggit gowukoi wa netkond re ngaya na. Nokim da idenat komkesa riga maka sibibind tekeny yepim re gar ke utkunda ke Ken nokasi. 47 I

nangga ma ji rada yipa riga maka Koina opureni yitkak tutkundeneniny dide maka tawameneniny, Kon ma ita tin b'isagikam omnyin. Nokip Kon ma nok mana netkond da Kon gowukoi riga tesagikinyin, aji nok mana da gowukoi riga wa yirkokar takainyin. ⁴⁸ I yet ra Ken nitisai dide maka Koina opureni yitkak takasiny, si ita ji ti b'isagikam riga. Si onggityam yitkaktemb rina re Kon apulisinond, tin negir ma b'isagikam omny dem kikitum bibirind. ⁴⁹ Mop nokip Kon apureninyin re ma Kor nony kaim aji Ti pilkaim yet re Ken nitmikitonj. Ton kea Kor b'ingawa yit nokawonj nangga im Kon tapureninyin i ringmim Kon tapureninyin. ⁵⁰ Si Kon wumir en da Tina b'ingawa yit re dadal ngirpu kesa yirkokar e. Si onggit mop paimemb Kon insima yipa ririrkipjog yitkak apureninyin ringma na re Ken Kor B'u wumir nomnonj.”

13

Yesu Tina B'auyaena Riga Pis Esekinonj

¹ I yimta kena Ju riga waina Uj Igwanti Nony Iyena Diyamdiyam Win awonj, aji Yesu kea wumir awonj da win re kemb ririr ainy Tinim onggityam gowukoi iraram dide iwatam Ti B'uim pilwa. Si Ton Tinajog riga na singi eyeninonj yepiya re gowukoyind wekenonj. I Ton ten kupkakupka singi eyeninonj ngirpu de Tina undwatapu wa. ² I re Yesu dide Tina b'auyaena riga diyamdiyam auto, Satanat kea Simonimna b'iga Yudas Iskariyotimna gar wa singi yoramitonj Yesund tib iyoyim. ³ Si Yesu wumir na da

Ti B'u kea komkesa gasa re Ti yim nat aramisi-
nonj. I Ton nonyik b'amdonj da, "Kon Godim
pilkena netkond dide kanamb Kon titenjin Godim
pilwa." ⁴ I Yesu ket onyitonj diyamdiyampu kasa
ke dide Tina tumind kobirgim yotogikonj. Seg Ton
ket tawel yokatonj dide ket robmopind b'ibgonj.
⁵ Seg ket Ton nyi yigmarkonj besen bora wa, i
ket b'atomonj Tina b'auyaena riga pis isekam dide
usurenam tawel ke rina re Ton robmopind b'ibgi
yowamonj. ⁶ I re ket Simon Petrom pilwa yikonj,
ton Yesund yomnonj da, "Yonggyam! Ma Man ita
pis nitiseket?" ⁷ Si Yesu tin yismonggawonj da, "Yu
man ma ita nony auket nangga e Kon yomniken,
aji yimta kae man nony tauket dem." ⁸ I Petro
ket Tin yomnonj da, "Man makwa ririr et koina
pis isekam." I Yesu ket tin mira yomnonj da, "Ra
maka ra Kon mitiseken, mor awir e Kon kima
b'inkindena." ⁹ I Simon Petro Tin yomnonj da,
"Yonggyam! Goro koina pis nena tesekim aji bea
kwa yim ake mop." ¹⁰ Si Yesu tin mira yomnonj
da, "Gony auren rigat inta pis nena b'itisek aji
ma opima ninda kipear. Nokip tina kupka ji re
kilkesa e. Si win kilkesa im aji ma komkesa im."
¹¹ I nangga mop pena Ton yindonj da, "Ma win
komkesa kilkesa im," mop nokip Ton wumir na da
towa wingirind yipa rigatemb Tin tib yii dem.

¹² I re Yesu towaina pis iseka seg awonj, Ton
Tina tumind kobirgim b'ikitonj dide ket b'usaya
Tina pipmet wa omitonj. I ket ten amninonj da,
"Ke win wumir yokasya nangga na Kon wanim
yomniken?" ¹³ Win Ken nogenaya Ouyaena Riga
kae dide Yonggyam kae. Si waina opurena re
iminjog i. Nokip Kon intenemb ji Riga. ¹⁴ Kon, ite

re wa Yonggyam dide Ouyaena Riga, kea waina pis esekinyin. Si onggit paemb widaka b'ogla walenggyam walenggyam pis b'iseka tuwenyit. ¹⁵ Kon wingata mile na wa akainyin, nokim da idenat widaka kwa odede mile omnikenenya ringma na re Kon wanim yomniken. ¹⁶ Kon iminjogjog wen tamninyin. Wiko riga re ma ukoyam e, aji tina yonggyam re ukoyam e. I daka yidir riga re ma ukoyam e, aji riga yete re tin yitmikis re ukoyam e. ¹⁷ Si ra win wumir okatenya onggityam gatab dide ra win onggityam mile tamnikindam, win re b'ogil omni riga im.

*Yudasimna Tib Iyoi gatab Bage Yit
(Mat 26:20-25; Mak 14:17-21; Luk 22:21-23)*

¹⁸ “I Kon ma komkesa wa gatab e nindenyin. Si Kon wumir en yena re Kon abagikinond. Aji onggit ma da onggit yina peba yitkak ririrkip rain da, ‘Yet re koina owou yowenenonj, ton kea ken kak niawonj.’ ¹⁹ Yu Kon naska kana im wen wumir amninyin gasa rinte ra tawik Kor pilind. Nokim da ra itemb gasa pita tainy idenat win gar ke utkunda ke notkasya dem da Kon intemb ji riga. ²⁰ I Kon iminjogjog wen tamninyin. Yet ra Koina itmikiti rigand okateny, ton Kena nokateny. I yet ra Ken notkateny, ton Tina yokateny yet re Ken nitmikitonj.”

²¹ I re Yesu onggityam yit seg awonj, Ton ma sobijog na kid b'ipokenonj. Si Ton ket yir ungata yit yindonj da, “Kon iminjogjog wen tamninyin. Wa wingirind yipa rigat ita man Ken tib niyit dem.” ²² Si Tina b'auyaena rigap nonysipsip na aukito da ya gatab e Ton yindeny. Si ton ket

yirik b'unjomkena wuwenonj towa wingirind. ²³ I Tina b'auyaena riga wingirind yipa riga Ti wus kena yimkomel b'amki omi yibnonj yena re Ton singi yiyenonj. ²⁴ Si Simon Petro onggit rigand mong ke yomnonj da, "Tin yigekite men wumir omnam ya gatab e Ton yindeny!" ²⁵ Si itemb riga ija na Yesumna dorkak wusind b'irmekiti yibnonj, i ket Yesund yomnonj da, "Yonggyam! Yetemb ji riga?" ²⁶ Si Yesu ket mira yomnonj da, "Ra Kon onggityam owou pikendi isonggen dor dide ti okaen, si tontemb ji riga." Seg Ton ket owou pikendi yisonggonj dide ket Simonimna b'iga Yudas Iskariyotim yokawonj. ²⁷ I re Yudas onggityam owou pikendi yokatonj, si odede natemb ket Satana ti pilind b'igaronj. Si onggit penaemb Yesu tin yomnonj da, "Man wanakana mile yomnike rinte re man yisamket omnikam!" ²⁸ Aji onggityam owoupund omniki riga wingirind makwa ke yipa riga nony aukonj nangga pena Ton odede yit tin yomnonj. ²⁹ Si nindap ija na nony aukito da Yesu nok ma tin yominy da, "Man gasa meranim temjinyit onggityam diyamdiyam winind ingaenam" o minda da, "Ninda gasa tagoniny gasa kesa riga wa." Mop nokip Yudas re wulkip ga owama riga na yibnonj. ³⁰ Si re itemb riga Yudas owou pikendi yokatonj, ton odenja ket bau wa opmarkitonj. Si itemb re ket kea siwiny awonj.

Petromna Oena gatab Bage Yit

(Mat 26:31-35; Mak 14:27-31; Luk 22:31-34)

³¹ I re Yudas bau wa opmarkitonj, Yesu yindenonj da, "Otade Rigamna B'iga kea b'ogil inyomarena yokas dide God daka kwa kea Ti

pilke b'ogil inyomarena yokas. ³² I rada God kea Ti pilke b'ogil inyomarena yokas, si God daka kwa ita Rigamna B'igam Tina b'ogil inyomarena okau. Si Ton ita odenja Ti okau. ³³ Kor b'igawar! Kon ma pinjog e nitibnyin win kima. I ingkaemb ket win Ken oraka nitiyanya dem. Si Kon otade wen wumir amninyin re odede yipa wip im rija na re Kon Ju riga waina mopyam riga wumir amninond da win ma ririr im menonim de ritama ra Kon neken dem. ³⁴ I Kon wa sisil b'ingawa yit takainyin. Win b'ogla singi b'itiyenindam wa wingirind. Kon kea singi wen eyeninond, si widaka kwa ija na singi b'itiyenindam wa wingirind. ³⁵ Ra win singi b'itiyenindam wa wingirind, si idenasimemb komkesa rigap wen tangwatananj da win re Koina b'auyaena riga im.”

³⁶ I ket Simon Petro Yesund yigekitonj da, “Yonggyam! Ritama man meket?” I Yesu ket yismonggawonj da, “Yu man ma ririr et Ken yimta undokam ritama ra Kon neken. Aji yimta kae man yimta nutundoket dem.” ³⁷ Si Petro kwa Tin yigekitonj da, “Yonggyam! Nangga mop pae yu kon maka ririr taen men yimta undokam? Kon Mor mapae koina yirkokar b'atkaen.” ³⁸ Seg Yesu ket tin mira yomnonj da, “Si ita man Kor map moina yirkokar b'atkaet? Kon iminjogjog men motinyin. Pauro ma ita wanaka ara ikeny dor ngirpu ra ket man nowapyam Ken notiyenyit.

14

Yesuta Nya B'uim pilwa

¹ “Goro win gar bebig taukinam! Win Godind gar ke utkunda ke yokata dide Keda kwa gar ke utkunda ke nokata! ² Kor B'uimna metind opima jogjog wimenapu pipmet wekeny. Rako pipmet demb de maka wekeny, Kon keako wen wumir amninond. Si Kon neken ra wanim pipmet ongonjena mim. ³ Si ra Kon neken dem dide ket wa pipmet tangonjenainyin, si Kon kwa b'usaya titenjin dem. I Kon ket wen taronsinyin dide ket eyinyin dem Koinajog pipmet wa. Si idenat wida tekenenyit de rokate re Kon nibnenenyin. ⁴ I win wumir im onggityam nya de onggit pipmet wa ritama ra Kon neken.” ⁵ Seg Toma ket Yesund yomnonj da, “Yonggyam! Sin ma wumir im ritama man meket. Si ridede im sin wumir taukindam onggit nya gatab?” ⁶ I Yesu ket tin mira yomnonj da, “Konta nya i iminjog yitkak i dide yirkokar. Si makwa ngai yipa rigat ita yik Kor B'uim pilwa, ra ton maka Ken yimta nutundok. ⁷ Rada win kea Kornim wumir aukindam, si win kea Kor B'uim daka kwa wumir aindam. Si otade im win Tinim wumir aukindam i win kea Tin yir yongenenyima.” ⁸ Seg Pilip daka ket Yesund yomnonj da, “Yonggyam! Bea sin B'und nouyaene! Si idenatemb sin nony ririr taindam.” ⁹ Si Yesu tin mira yomnonj da, “Pilip! Kon ma wus na netkimin win kima. Ma man makaya Kornim wumir yokasit? Yet re Ken yir ongong nitiyim, ton kea Kor B'und yir ongong iyim. Si ridede pae man mindenyit da, ‘Bea sin B'und nouyaene?’ ¹⁰ Si ma man itaemb wumir aet da Kon re nibnyin Kor B'uim pilnate dide Kor B'u re yibim Kor pilnate? Onggityam yitkak

rinsim re Kon wanim apurenawainyın, ma Kor nony kaim opurena eyeninyın, aji Kor B'ute yete re Kor pilind wimena yikeny, Tonte Tina wiko omnika yiyeny. ¹¹ Si man gar ke utkunda ke Ken nokate da Kon re nibnyın Kor B'uim pilnate dide Kor B'u re yibim Kor pilnate. Aji ra man maka Ken gar ke utkunda ke notkasit, man b'ogla onggityam Koina omniki kid kesa kima danda wiko gar ke utkunda ke takasinyit. I ingkaemb man ket Ken gar ke utkunda ke notkasit. ¹² Kon iminjogjog wen tamninyın. Yet ra Ken gar ke utkunda ke notkas, toda kwa onggityam wiko im omnika teyeniny rina re Kon omnika teyinond. I opimemb wiko re ma ukoi im, aji ton ukoi-jog wiko im omnika teyeniny. Mop nokip Kon neken ra Kor B'uim pilwa e. ¹³ I Kon opima onggityam gasa tamnikeninyın rinsim ra win Koina nyi kima netirkenenya. Nokim da idenat B'u b'ogil inyomarena takasiny B'igam pilke. ¹⁴ Ra win nangga gasa mana Ken netirkenenya Koina nyiwınd, Kon opima tamnikeninyın.

Yınayına Wingawingam gatab Tirir Omni Yit

¹⁵ “I ra win Ken singi nitiyenya, si win b'ogla Koina b'ingawa yit yimta undoka teyenindam. ¹⁶ Kon ita Kor B'und igekisin, si Ton wa tetmikitaui yipa yir ipka dide ouyaena riga. I Ton ket ita win kima dadal ngirpu kesa ibneneny. ¹⁷ Ton re iminjog yitkakimna Wingawinga e. I gowukoi rigap ma ririr im Tin okatam, mop nokip ton makaya Tin yir yongi dide makaya Tinim wumir yokasi. Aji win Tinim wumir im nokip Ton win kima e yibim dide Ton wa pilnate ibneneny. ¹⁸ Kon

ma ita wen terarinyin ngungum b'iga pila, aji ita wa pilwa netken dem. ¹⁹ I sobijog win kak ke gowukoi rigap ma ita yir notngi dem. Aji win ita yir notngya dem, nokip Kon yilo e nibnyin dide widaka kwa yilo im tekenyit. ²⁰ Si win onggit bibir nasimemb nonyik b'atimjindam dem da Kon re nibnyin Kor B'uim pilnate, i win re wekenyit Kor pilnasim, i Kodaka re nibnyin wa pilnate. ²¹ Yet ra Koina b'ingawa yitkak tawaminy dide ra opimemb yitkak yimta tundokiny, si onggit rigatemb Ken singi niyeny. I kwa yet ra Ken singi nitiyeny, Kor B'u ita tin singi iyeny. I Koda kwa tin ita singi iyenyin dide ket Kon Kolenggyam ita tinim pitapita taenenenyin.” ²² Seg ket Yudas, goro Yudas Iskariyot, ton Yesund yigekitonj da, “Yonggyam! Man kea sowa pilwa pitapita aenyit. Aji nannga pae maka gowukoi riga wanim pitapita taenyit?” ²³ Si Yesu ket tin yismonggawonj da, “Yet ra Ken singi nitiyeny, ton ita Koina yitkak yimta tundokiny. I Kor B'u daka ita tin singi iyeny. I dide Sin opima ti pilwa wuyin dide ket wimenapu pipmet omgu ti pilind yipand wimenam.* ²⁴ Yet ra maka singi nitiyeny, ton ma ita Koina yitkak yimta tundokiny. Si onggityam yitkak rinsim re win utkundenindam re ma Koina im aji Kor B'uimna im yet re Ken nitmikitonj.

²⁵ “Si onggit ganggand re Kon win kima nibnenenyimin ngirpu yu, Kon kea onggityam komkesa yitkak gatab wen amneninyimin. ²⁶ I onggit yir ipka dide ouyaena riga re Yinayina Wingawingate. I Kor B'u ita itmikis dem Kor

* **14:23:** Onggityam “Sin” yisipkis re B'u, B'iga dide Yinayina Wingawinga im.

nyî kima. Si Tonsim komkesa gasa gatab wen tauyaeniny dem dide wen nonony tamneniny dem komkesa yitkak gatab rina re Kon wen amneninond. ²⁷ I Kon ngimbla iraren re wanim ma. Si Kon ita Koina ngimbla wa takainyîn. Onggityam ngimbla rînte ra Kon takainyîn re ma ija e ringma re gowukoyit agoneniny. Si win goro gar bebig dide moga tainindam. ²⁸ I win kea utkundenya onggityam yitkak rina re Kon nindeniyîn da Kon ita neken dide ket titenjin wa pilwa. Si rada win Ken singi e niyenyâ, win sam im taindam Koina menon gatab de Kor B'uim pilwa. Mop nokip Kon re ma ukoi en aji Kor B'u re ukoi jog e. ²⁹ I yu Kon naska kana im wen onggityam gasa gatab wumir amninyîn rînsim ra taukanj. Nokim da ra ton pita taukanj idenat win gar ke utkunda ke Ken notkasya. ³⁰ I Kon ma pin e win kima yitnono taenyîn nokip gowukoyimna wip iyoi riga Satana re kemb itemb ke ik. Aji ti awir e kwa danda ingawam Kor pilind. ³¹ Aji Kon nok ma singi da gowukoi riga wumir rainem da Kon ita Kor B'und singi yiyenyîn dide Kon insima gasa amnikeninyîn ringma na re Kor B'u Ken ningawonj. Utnikinam ingkek, i ka wuyîn!

15

Iminjog Greip Kai Yesu

¹ “Kon re iminjog greip kai en, i Kor B'u re wala riga e. ² Komkesa bia rînsim re Kor pilind wekeny, ra ton maka kip tejagikanj, Kor B'u opima onggityam bia awir omnikam tepkiny. I kwa komkesa bia rînsim re kip kima wekeny, Kor B'u

opima ninda negir pip ipka teyeniny kilkesa omnam, nokim da idenat ton jogjog kip tejagikiny. ³ Si win re kea kilkesa omni im onggityam yitkak ke rina re Kon wen amneninond. ⁴ Win b'ogla wimena tuwenyit Kor pilind, i Kodaka kwa ita wa pilind wimena netkenyin. Si yipa biat maka ra greip kayind wimena ikeny, ton ma ririr e tileng-gyam kip tejagikiny. Toda yipa wip e ra win maka ra Kor pilind tekenyit, win ma ririr im kip ijagikam. ⁵ Si Kon re greip kai en, i win re bia im. Yet ra Kor pilind wimena ikeny, Kodaka kwa ita ti pilind wimena netkenyin. Si ton ingkaimemb jogjog kip tejagikiny. Mop nokip man makwa ngai ririr et Kor kesa ke nanggamog wiko omniam. ⁶ I yet ra maka Kor pilind wimena ikeny, ton ija e wip it re sopapu bau wa b'iskoki bia re dide. Si ra irna seg sopapu wiko rigat ket bobo tamnikiny dide wul wa b'itiskokiny i dide ket tembrikiny. ⁷ I ra win Kor pilind wimena tuwenyit, dide ra Koina yitkak wa pilind tekeny, si ra win nangga singi mana Ken nitgekisya, win ita okasya. ⁸ I ra win jogjog kip tejagikindam dide Koina b'auyaena riga taukindam, si ingkaemb win Kor B'und b'ogil inyomarena okaenya. ⁹ I Koda kwa ija ima wen singi eyeninyin rija e re Kor B'u Ken singi niyeny. Si win b'ogla Koina singi b'iyena milend tuwenyit. ¹⁰ Kon kea Kor B'u ma b'ingawa yit yimta undoka eyeninond, si ingkenaemb Kon Tina singi b'iyena milend wimena nekenond. Si widaka ija na kwa Koina b'ingawa yit yimta tundokindam Kon re dide, si ingkaimemb widaka Koina singi b'iyena milend wimena tuwenyit.

¹¹ “Si onggit mop penaemb Kon onggityam yit

ke wen amninyin da idenat Koina sam waina garind ibim dide ingkaimemb kwa Kon onggityam waina sam yindangir tamnikinyin. ¹² Itemb ji Koina b'ingawa yit da win b'ogla wa wingirind singi b'itiyenindam rija im re Kon wen singi eyeninyin. ¹³ Awir e kwa yama ukoi jog singi b'iyena mile yibnau, aji inta ra ton tina yirkokar b'atkau tina rigawar map. ¹⁴ Si ra win Koina b'ingawa yit yimta tundokindam, win re kea Kor rigawar im. ¹⁵ Si Kon ma ita ket wen wiko riga ke nyi tagenainyin, nokip wiko riga ma wumir e nangga im ti yonggyam amnikiny. Aji Kon wen nyi agenainyin re Kor rigawar kaim, mop nokip Kon kea wen komkesa gasa wumir amnikinond rina re Kon Kor B'uim pilke utkundenond. ¹⁶ Win maka Ken nobagendonda, aji Konit wen abagikinond, dide nyi akainond. Nokim da idenat win tuwenyit i kip tejagikindam i dide onggityam waina kip imnineni kesa tekeny. I nokim da kwa ra win nanggamog gasa mana Kor B'und erkenya Kor nyi kima, idenat Ton wa tagoniny. ¹⁷ Si onggit mop penaemb Kon onggityam yit ke wen engainyin da idenat win wa wingirind singi b'itiyenindam.

Gowukoi Rigaina Singi kesa Mile

¹⁸ "I ra onggit gowukoi rigap wen singi kesa tamnenanj, win b'ogla wumir okasya da ton naska kea Ken singi kesa nomneno, aji yimta kaim wen singi kesa amnenanj. ¹⁹ I rada win gowukoi ke riga im, gowukoyit keako wen singi eyeniny, nokip win gowukoi ke riga im. Aji win ma gowukoi ke riga im, aji Konit wen abagikinond onggit gowukoi ke. Si onggit mop paemb gowukoyit wen

singi kesa amneniny. ²⁰ Si win b'ogla nonyind yowama onggityam yitkak rina re Kon wen amnonj da, 'Wiko riga re ma ukoyam e, aji tina yonggyam re ukoyam e.' Si rada rigap ke Kor pilind bebig dide b'isadrena mile oramka niyenauto, ton opima kwa daka wa pilind bebig kima b'idgotnena oramka teyenaurnj. I rada rigap ke Koina yitkak yimta yundoko, ton opima kwa daka waina yitkak yimta undoki. ²¹ Aji rigap opima Koina nyi map komkesa odede mile tamnikenenanj wa pilind, mop nokip ton ma wumir im Godim yet re Ken nitmikitonj. ²² I rako Kon maka netkond dide ten maka wumir amneninond, ma rako towa pilind negir mile wekeny. Aji yu ton ma ririr im mop ogenka teyenanj towaina negir mile gatab. ²³ I yet ra Ken singi kesa notineny, ton kwa daka Kor B'u na singi kesa yomnony. ²⁴ Si rako Kon maka towa wingirind onggityam wiko amnikeninond rina re yipa rigat maka ririr awonj omnikam, ma rako towa pilind negir mile wekeny. Aji yu Kon nitinjin da ton kea onggityam kid kesa kima danda wiko yir ongong eyento, aji ton kea Sin singi kesa nomneno Ken dide Kor B'und. ²⁵ Aji itemb re onggityam yitkak ririrkip omna ma rinte re iriki yibim towaina gog yit wingirind da, 'Ton ril kesand Ken singi kesa nomneno.'

²⁶ "Si ra yir ipka dide ouyaena riga ik dem yena ra Kon Kor B'uim pilke itmikisin wa pilwa, Ton re iminjog yitkakimna Wingawinga e. Si ra Ton Kor B'uim pilke ik dem, Tonsimemb Kor gatab yir ungata yit pitapita tamneniny dem. ²⁷ I wida kwa b'ogla Kor gatab yir ungata yit pitapita tamnenindam, mop nokip win kea otomapu ke Kon kima

wekenot ngirpu yu.

16

Bebig kima B'idgotnena gatab Bage Yit

¹ “Si onggit mop penaemb Kon onggityam yit ke wen amneninyin da idenat win maka sap totekin-dam. ² I rigap opima wen Ju riga waina yir opmitenapu met ke teaukenanj dem. Aji ita ji win ik dem, si onggit winind rigap opima wen uj ondrika teyenanj dem. I onggit onganda rigap ija im nony taukanj dem da, ‘Sin kea Godim b'ogil wiko yomnikau.’ ³ Ton maka wumir aukito Kor B'uim dide kwa Kornim, si onggit paemb ton odede wiko tamnikanj dem. ⁴ Aji onggit mop penaemb Kon onggityam yit ke wen amneninyin da ra onggityam bebig win ik dem, idenat win onggityam yitkak nonyik tamjindam dem rinsim re Kon wen wumir amneninyin.

Yinayina Wingawinga ma Wiko

“Otomapu ke Kon onggityam yitkak maka wen wumir amninond, mop nokip Kon omanda win kima nibnond. ⁵ Yu Kon neken Ti pilwa e yet re Ken nitmikitonj. Si wa wingirind makwa yipa rigat Ken ke nerkis da, ‘Ritama Man meket?’ ⁶ Aji re Kon onggityam yit ke wen amneninyin, si waina gar re kea gar kopa ke yindangir auki im wekeny. ⁷ Aji Kon kwa iminjog yitkak e wen wumir tamninyin. Itemb re wanim b'ogil e ra Kon tewaikisin, mop nokip ra Kon maka neken, si onggityam yir ipka dide ouyaena riga ma ita wa pilwa ik dem. Aji ra Kon neken, Kon ita wa pilwa Tin itmikisin dem. ⁸ I ra Ton ik, Ton ita gowukoi riga wa temjatenainy

dem negir mile gatab i negir kesa dimdimjog mile gatab i dide b'isagika mile gatab. ⁹ Negir mile gatab re intemb it re da rigap ma opima gar ke utkunda aramkiranj Kor pilind. ¹⁰ I negir kesa dimdimjog mile gatab re intemb it re da Kon neken ra Abum pilwa e i win ma ita ket Ken yir notngya. ¹¹ I b'isagika mile gatab re intemb it re da onggit gowukoyimna wip i yoi riga Satana re kea negir ma b'isagika okati e yibim.

¹² “Kor ma yipa kima yit im pop nibnainy wanim wumir omnenam, aji otade win ma ririr im okatenam. ¹³ Aji ra onggit iminjog yitkakimna Wingawinga ik dem, Tonsim wen wang teyeniny dem komkesa iminjog yitkak wingir wa. Mop nokip Ton ma ita tina nony ke yit tapureniny, aji ina nena im tapureniny nangga im re Ton utkudeniy. I kwa Tonsim wa pitapita tamnenainy onggityam yitkak rinsim ra wari taukanj. ¹⁴ Si Ton Kor pilkaim yitkak tutkundeneniny dide ket onggityam yitkak im wa pitapita tamnenenainy. I ingkaemb Ton b'ogil inyomarena Kor notkaeneny. ¹⁵ I komkesa gasa rinsim re Kor B'uim pilind wekeny re Koina im. Si onggit paemb Kon nindeniyin da, ‘Yinayina Wingawinga Kor pilkaim yitkak tutkundeneniny dide ket onggityam yitkak im wa pitapita tamnenenainy.’

Gar Kopa kak ke B'ogil Sam

¹⁶ “I Kon ma pin im wen terarinyin, onggit sobijog winind win ma ita yir notngya. Aji onggit win kak ke ita kwa yir notngya dem.” ¹⁷ Si onggit penaemb ninda Tina b'auyaena riga b'arkenya wuwenonj towa wingirind da, “Nangga

e ji onggityam yitkak rinte re Ton men wumir nomneniny da, 'I Kon ma pin im wen terarinyin, onggit sobijog winind win ma ita yir notngya. Aji onggit win kak ke ita kwa yir notngya dem' i kwa onggityam yitkak da, 'Kon neken ra Abum pilwa e'?" ¹⁸ I kwa omanda ton b'arkenand wekenonj da, "Nangga e ji onggityam yitkak rinte re Ton yindeny da, 'Ma pin e ji win'? Si men ma wumir im nangga e Ton yindeny." ¹⁹ I Yesu kea wumir yokatonj nangga na re ton singi aukito Tin erkitam. Si Ton ten amninonj da, "Ma win inte onggityam yitkak isipkitam yorakya rina re Kon nindenyin da, 'I ma pin e ji win ra win maka Ken yir notngya. Aji onggit kak ke ket kwa ma pin e ji win ra win Ken yir notngya dem'? ²⁰ I Kon iminjogjog wen tamninyin. Ra onggityam win pita tainy, win yii opima tainindam dide gar kopa kima yii b'itrinenindam, aji gowukoi rigap sam e omnika iyenyi. Si win gar kopa tainindam aji onggityam waina gar kopa b'etingkanj ra ukoi sam mim. ²¹ I ra konggam momta mina b'ujena win titkau, ton gar kopa e okateny, nokip kemb itemb ke Ti win titkau. Aji ra ton b'iga ukenj, ton makwa ita ket tina b'idgotnena gatab nony iyeny aji sam o tainy da b'iga ke ukenj onggit gowukoi wa. ²² Si onggit paemb wida kwa yu odedemb gar kopa yokatenya. Aji ra Kon b'usaya wen yir tanginyin dem, win gar sam im taukindam dem. I makwa ita yipat onggityam waina sam teomneniny wa pilke. ²³ I onggit bibirind win makwa ita nangga ma netirkenya dem. Si Kon iminjogjog wen tamninyin. Nangga mana ra win Kor B'und erkenya Koina nyiwind, si Ton opima wa takainy. ²⁴ Naskand win maka

Godind yerkenonda Koina nyiwind ngirpu yu. Aji yu win ket b'ogla Koina nyiwind erkenya, i ket win opima takatenindam. Si idenatemb waina gar sam ke yindangir auki tekeny.

Yesu Gowukoi Gou wa Yomnonj

²⁵ “I Kon wingata yit kena onggityam yitkak wa apurenainyın. Aji ita ji win ik ra Kon maka ket wingata yit ke wa tapurenainyın. Aji Kon ket pitakip nasim wa pitapita tamnenainyın Kor B'uim gatab. ²⁶ I onggit bibirind win opima Koina nyiwind erkenya. Aji Kon ma odede ma nindeneyın da Konte Kor B'und erkenyın wa gatabind. ²⁷ Nokip B'ute Tilenggyam wen singi eyeniny. Si nangga pae Ton wen singi eyeniny re, nokip win kea Ken singi niyeny dide gar ke utkunda yoramitenya da Kon netkond re Godim pilkena. ²⁸ Si Kon netkond re Kor B'uim pilkena dide ket opendond onggit gowukoi wa. I Kon kwa iraren onggityam gowukoi dide ket titenjin Kor B'uim pilwa.” ²⁹ Seg Yesumna b'auyaena rigap Tin yomno da, “Yir de, otade Man keamb pitakipind mindenyit. Dide Man maka nanggamog wingata yit na yingaet. ³⁰ Si sin otade wumir yokasu da Man wumir et-a komkesa gasa. Si Man ma ita yena riga yir ungaet nanggamog gatabim Men metirkeny. Si onggit wumir kaimemb sin gar ke utkunda ke Men mokasu da Man re Godim pilkena metkot.” ³¹ I ket Yesu mira amninonj da, “Si ke win otade wumir yokasya? ³² Si yir de, ita ji win ik ridenat ra win komkesa wetaweta taukindam waina yipayipa pipmet wa dide ket Ken nena e nitrarya. Si itemb ke onggityam win ik. Aji Kon

ra ma Kenta e taen, nokip Kor B'u ita Kon kima yibneneny. ³³ Si Kon onggityam yit wen wumir amneninyin, nok mim da idenat win ngimbla okatenya Kor pilind. I win opima b'idgotnena takatenindam onggit gowukoyind, aji win b'ogla napnap towinkindam, nokip Kon kea onggityam gowukoi danda kesa yomnond.”

17

Yesu Tinim Yir Opmitenonj

¹ I re Yesu onggityam yit opurena seg awonj, Ton wub kumb wa wip b'urowatonj dide ket yir opmitonj da,

“Abu! Kemb itemb ke win ik. Man b'ogla Mor B'igam b'ogil inyomarena yokae! Si idenat B'igat Todaka Mor b'ogil inyomarena motkau. ² Man kea Mor B'igam odede danda yokawot komkesa riga wip omnam, nokim da idenat Ton komkesa riga wa dadal ngirpu kesa yirkokar takainyena re Man Ti yokainot. ³ Si itemb ji dadal ngirpu kesa yirkokar da rigat wumir e yibim Mornim yete re Man yipaina iminjog God mibnyit dide Yesu Kerisom yena re Man yitmikitot. ⁴ Kon kea onggityam wiko yundwasin rina re Man Kor nokawot omniam. Si ingkaemb Kon b'ogil inyomarena Mor mokaenyin onggit gowukoyind. ⁵ Abu, naskand re onggityam gowukoi maka aukonj, Kon kea Man kima b'ogil inyomarenand nibnond. Si otade Man onggityam b'ogil inyomarena nokae Man kima yipand onggityam b'ogil inyomarenand wimenam.

Yesu Tina B'auyaena Riga wa Yir Opmitenonj

⁶ “I Kon ke Moina nyi pitapita yomnenond onggityam riga wa pilwa yena re Man Kor nokainot onggit gowukoi ke. Ton Mornim mana wekenonj, aji Manit Kor nokainot. I ton ket Moina yitkak e yimta undoka yiyenyi. ⁷ Yu ton ket wumir im da komkesa gasa rina re Man Kor nogoninot re Mor pilkaim. ⁸ Mop nokip Kon kea towa onggityam yitkak akainond rina re Man Kor nokainot, dide ton kea onggityam yitkak akatento. I ton ket iminjog wumir yokato da Kon netkond re Mor pilkena dide ton ket gar ke utkunda yoramito da Manit Ken nitmikidot. ⁹ Si Kon towanim metirkisin. Aji Kon ma metirkisin onggit gowukoi riga gatab e aji towa gatab e yena re Man Kor nokainot, nokip ton re Mor mim. ¹⁰ Koina komkesa gasa re Mor mim, i Moina komkesa gasa re Kor mim. Si Kon towa pilkaemb b'ogil inyomarena yokatenyin. ¹¹ I Kon makwa ita ket nitibnyin onggit gowukoyind, aji ton opima tekeny onggit gowukoyind. Si Kon neken ra Mor pilwa e. Yinayina B'u! Man b'ogla ten yir ipka teyeninyit Moina danda nyi ke rina re Man nokawot! Nokim da idenat toda yipaina taukanj odede ringmim re Men wekenyin. ¹² I re Kon ton kima nibnenenyimin, Kon kea ten yir epkeneninyimin onggityam Moina danda nyi ke rina re Man nokawot, dide Kon kea yirgong amnikeninyimin. Si towa wingirind makwa yet b'edamkisim. Aji ina yipaina wul tunggimna b'iga nenat, nokim da idenat yina peba ririrkip tainy. ¹³ Si yu Kon ket netken Mor pilwa e, aji Kon onggityam yit apureninyin re

onggit gowukoi nate, nokim da idenat Koina sam yindangir auka ikeny towaina garind. ¹⁴ ¶ Kon kea Moina yitkak towa akainond i gowukoi rigap ten singi kesa amnenenanj. Mop nokip ton ma gowukoi ke riga im ket odede ite re Kon ma onggit gowukoi ke riga en. ¹⁵ Kon ma nok ma merkisin da Man ten temjinyit onggit gowukoi ke, aji nok ma da Man ten yirgong tamnikeneninyit negirjog riga Satanam pilke. ¹⁶ Ton re ma gowukoi ke riga im odede ite re Kon ma gowukoi ke riga en. ¹⁷ ¶ Moina yitkak re iminjog yitkak e, si Man ten yinam amnine onggityam iminjog yitkak ke. ¹⁸ ¶ Man kea Ken nitmikitot onggit gowukoi wa, si Koda kwa odede wip imemb ten etmikeneninyin onggit gowukoi wingir nata. ¹⁹ Si Kon Kolenggyam yina omnam b'akaenyin towanim b'ogilim, nokim da idenat toda towalenggyam wingawinga kilkesa taukanj iminjog yitkak ke.

Yesu Sosi gatab Yir Opmitenonj

²⁰ “¶ Kon merkisin re ma towanim nena ma, aji daka towanim ma yepim ra Ken gar ke utkunda ke notkasi towaina bage yit ke. ²¹ Abu! Ton komkesa b'ogla yipaina raukinem odede ite re da Man mibnyit Kor pilnate i Koda kwa re nibnyin Mor pilnate! Si idenat ton Mera pilind tekeny. Nokim da idenat gowukoi rigap iminjog ke okasi da Manit Ken nitmikitot. ²² Si Kon kea towa akainond onggityam b'ogil inyomarena rina re Man Kor nokawot, nokim da idenat ton yipaina taukanj odede ite re Men yipaina wekenyin. ²³ ¶ Kon towa pilnate

nibnyin dide Man Kor pilnate mibnyit. Si toda odede nya kaimemb kupkakupka yipaina tau-ranj. Nokim da idenat gowukoi riga wumir taukanj da Manit Ken nitmikitot dide Mansim ten singi eyeninyit odede ringma na re Man Ken singi niyenot. ²⁴ Abu! Onggityam riga rina re Man Kor nokainot, Kon singi en da ton Kon kima tekeny rokate ra Kon nitibnyin, nokim da idenat ton Koina b'ogil inyomarena yir ongenenyi. Si rina re naskand onggityam gowukoi maka pita awonj, Man kea onggityam b'ogil inyomarena Kor nokawot nokip Man kea Ken singi niyenot. ²⁵ Negir kesa dindimjog B'u! Gowukoi rigap maka wumir aukito Mornim aji Konit Mornim wumir awond. Si onggityam Koina b'auyaena rigap re kea wumir yokato da Manit Ken nitmikitot. ²⁶ I Kon kea Mor gatab ten wumir omnena teyinyimin ngirpu yu, i Kon kwa opima wumir omnena eyinyin. Nokim da idenat onggityam singi towa pilind ibim ringkae re Man Ken singi niyenyit dide Koda towa pilnate nitibnyin.”

18

Yesund Usunatam

(*Mat 26:47-56; Mak 14:43-50; Luk 22:47-53*)

¹ Re ket Yesu yir opmita seg awonj, Ton ket Tina b'auyaena riga kima wuwonj Kidron paga yipa tab wa. I ademb de yipa sopapu yibnonj, si Ton Tina b'auyaena riga kima onggit sopapu wingir wa wuwonj. ² I Yesu Tina b'auyaena riga kima ademb de win ke b'atabikenento. Si onggit penaemb Yudas yet re Tin tib yiyonj, toda kwa wumir na

yibnonj itemb pipmet. ³ Si Yudas yipa geja riga bobo dide ninda yinamet yir ipka riga akasinonj yina mopyam si riga wa pilke dide Parisai riga wa pilke. Seg ton ket lampa i ngaya dide ipowa gasa kima onggit pipmet wa wuwonj. ⁴ Si Yesu re kea wumir yokatonj komkesa mile rinsim ra Ti pilind taukanj. Si Ton wip wa b'isonkitonj dide ket ten arkisinonj da, "Yena win oraka iya?" ⁵ I ton mira yomno da, "Najaret tunggam Yesu." Si Yesu ten amninonj da, "Itenemb Kon." I Ti tib iyoyam Yudas toda omanda onyiti yibnonj. ⁶ I re Yesu ten amninonj da, "Itenemb Kon," ton ket kaknyakaknya gurgur itekto dide ket gou wa sap otekto. ⁷ Si Yesu b'usaya ten arkisinonj da, "Yena win oraka iya?" I ton ket yomno da, "Najaret tunggam Yesu." ⁸ I Yesu ket ten amninonj da, "Kon ke kim ninjin da, 'Itenemb Kon.'" Si rada win Kena oraka niyanya, si opimemb Koina riga wou." ⁹ Si nangga pena Yesu odede yindonj re nok mana da itemb yitkak ririrkip tainy rina re ton yopulitonj da, "Kon makwa ke yipa yidamkismn towa wingirind rina re Man Kor nokainot." ¹⁰ I Simon Petrom re kea giri yibnawonj. Si ton ket giri yitringatonj dide ket yingawonj yina mopyam si rigamna wiko rigam pilind i dide ket tina yimjog ke yipya rom yipmarkitawonj. I itemb wiko rigamna nyi re Malkot. ¹¹ Seg Yesu ket Petrond yiswangonj da, "Giri yupungite tina metkak wa! Ringma, ma ma ita Kon onaen onggityam b'idgotnena kapo rina re Kor B'u nokawonj?"

*Annasimna B'isagika Yesum gatab
(Mat 26:57-58; Mak 14:53-54; Luk 22:54)*

¹² Seg ket geja riga bobo dide towa wan tausin (1,000) Roma geja riga mopyam i dide Ju riga waina yinamet yir ipka rigap Yesund yimind yusunato dide ket Tin yijobiko. ¹³ Seg ton naska ket Yesund yiyo de Annam pilwa. Nokip ton re Kayapamna jeam na yibnonj. I Kayapa re onggit kemagind yina mopyam si riga na yibnonj. ¹⁴ I kwa Kayapatemb ji riga yet re Ju riga ugoionj da, “Si itemb re b'ogiljog emb ji ra yipa rigat uj okas komkesa Ju riga map.”

Petromna Oena gatab Yit

(Mat 26:69-70; Mak 14:66-68; Luk 22:55-57)

¹⁵ I Simon Petro dide yipa Yesumna b'auyaena riga Yesund yimta yundokonda. Itemb b'auyaena riga re yina mopyam si rigam wumir na yibnonj. Si ton kea ket Yesu kima b'igaronj onggityam yina mopyam si rigamna met kara wingir wa. ¹⁶ Aji Petro re onyiti na yibnonj kara bau ke. Si onggit penaemb onggityam b'auyaena riga yet re yina mopyam si rigam wumir yibnonj, ton kara mora wa itendonj dide ket mora yir ipka konggand yit womnonj Petrond igaram. ¹⁷ I re ton Petrond wingir wa yionj, mora yir ipka wiko konggat Petrond yomnonj da, “Ma madaka onggit rigamna yipa b'auyaena riga et?” Si ton womnonj da, “Nayi, ma Kon ton ten.” ¹⁸ I wiko riga dide yinamet yir ipka rigap wul yitano gibil map. I ton ket gibil b'irnito. I Petro daka re omanda ton kima onyiti gibil b'irrand yibnonj.

Mopyam Si Rigamna B'isagika Yesum gatab

(Mat 26:59-66; Mak 14:55-64; Luk 22:66-71)

19 I yina mopyam si rigat ket Yesund yerkitonj Tina b'auyaena riga gatab dide Tina ouyaena gatab. 20 Si Yesu tin yismonggawonj da, “Kon ke gowukoi riga wa wipind pita kipind apurenenainond. I Kon ita winind meraina yir opmitenapu met nata dide yinamet aband riga auyaeneninond rikind re komkesa Ju riga b'atabikenento. Si Kon maka nangga wigawiga yit na apureneninond. 21 Si nangga pae man Kor pilind b'igekita yoramisit? Si man tena arkenine yepiya re Ken nutkundeno nanggamog yit na Kon ten ameninond. Si yir de, ton wumirjog im wekeny nangga na re Kon apureninond.” 22 I re Yesu onggityam yit opurena seg awonj, yinamet yir ipka riga wingirind yipa rigat yet re Ti wusind onyiti yibnonj, ton Yesund ana yipokitonj. I ton ket wip singba kima Yesund yomnonj da, “Ma man odede wip yit kae yina mopyam si rigand yit ismonggaet?” 23 I Yesu ket tin mira yomnonj da, “Rada ke Kon negir yit yopulisin, man b'ogla yir ungata yit minde onggit negir yit gatab! Aji rada Kon iminjog yit e yopulisin, si nangga pena man Ken nonganjit?” 24 Si onggit penaemb Anna Tin didea yim ijobiki yitmikitonj de yina mopyam si riga Kayapam pilwa.

Petromna B'usaya Oena gatab Yit

(Mat 26:71-75; Mak 14:69-72; Luk 22:58-62)

25 I re Simon Petro onyiti gibil b'irnand yibnonj, ninda rigap tin yerkito da, “Ma mada yipa Tina b'auyaena riga et?” I ton ket b'aenonj da, “Nayi, ma kon ton ten.” 26 I omanda yipa mopyam si rigamna wiko riga yibnonj. I ton re onggit kus riga

na yena re Petro yipya rom yipmarkitonj. Si ton Petronde yomnonj da, “Ma ke kon men yir mongen kim re man Ton kima mibnyit de sopapu wa?” ²⁷ Si Petro b'usaya ket b'aenonj, i odenja ket pauro ara yikenonj.

Pilatomna B'isagika Yesum gatab

(Mat 27:1-2, 11-14; Mak 15:1-5; Luk 23:1-5)

²⁸ Seg ket Ju rigap Yesund Kayapam pilke yiyo de Roma gabmani mopyam riga Pilatomna wikopu met wa. Si itemb mile aukonj re sitawarjog natemb. I Ju riga maka onggityam Roma gabmani mopyam rigamna wikopu met wa b'igarkito, nokip ton ma singi na kil taukanj, nokim da idenat ket ton kilkesand Ju riga waina Uj Igwanti Nony Iyena Diyamdiyam owi. ²⁹ Si onggit penaemb Pilato bau wa opendonj towa pilwa, i ket ten arkisinonj da, “Win nangga mop pae onggit rigand kot wa oramitam iya?” ³⁰ I ton ket tin yismonggawo da, “Rako onggit rigat maka negirjog mile omnika riga yibim, sin ma rako Tin iyu mor pilwa kot omnikam.” ³¹ Si ket Pilato ten amninonj da, “Win walenggyam Tin yiya dide ket waina gog ke Ti pilind b'isagika mile yomnika!” I Ju rigap ket tin daka yomno da, “Sowa pilind awir e ingawam danda yibim riga ongandam.” ³² Si nangga pena onggityam mile aukonj re nok mana da idenat Yesu ma onggityam yitkak ririrkip tainy rina re Ton naska kana wumir amninonj ridede wip kae Ton uj okas. ³³ Si Pilato b'usaya tina wikopu met wingir wa b'igaronj dide ket Yesund ara yemokonj i ket yomnonj da, “Ma Man Ju riga waina king et?” ³⁴ Si Yesu ket tin yerkitonj da,

“Si man moinajog nony kae mindenyit o minda ninda rigapiya men odede wumir momnenyi Kor gatab?” ³⁵ I Pilato daka Yesund yerkitonj da, “Ma Man ija e nony aet da kon Ju riga en? Moina Ju yitam riga dide yina mopyam si rigapiya Men mitiyi kor pilwa kot omnikam. Si nangga negirjog mile na Man yomnikmit?” ³⁶ I ket Yesu mira yomnonj da, “Koina wip omnenapu kantri re ma onggit gowukoi kae. Rako da Koina kantri onggit gowukoi kae, keako Koina yir ipka rigap Ju riga epouranj Ken irmekam, nokim da idenat ton maka Ken mor pilwa nii. Aji Koina wip omnenapu kantri re ma onggit gowukoi kae.” ³⁷ Si Pilato ket Yesund yomnonj da, “Si man molenggyam king e b'agenat?” I Yesu ket tin mira yomnonj da, “Man kemb minjit da Kon re king en. Si Kon onggit mana pita awond dide onggit mana Kon netkond onggit gowukoi wa, nokim da idenat Kon yir ungata yit tapureninyin iminjog yitkak gatab. Si komkesa riga yepim re onggit iminjog yitkak tabind wekeny, ton opima Koina nonykok utkondenyi.” ³⁸ I Pilato ket Yesund yomnonj da, “Nangga e ji iminjog yitkak?”

I ton ket onggityam yit seg ke b'usaya bau wa opendonj Ju riga wa pilwa dide ket ten amnonj da, “Kon maka nanggamog negir mile na yodaraen Ti pilind. ³⁹ I ita ji wa yipa kesam owabinti mile ebnau da kon yipa sibibmet riga openjin wanim waina Uj Igwanti Nony Iyena Diyamdiyam Winind. Si ringma, ma win singi im kon Ju riga wa king openjin wanim?” ⁴⁰ Aji Ju rigap unena kima ognento da, “Goro onggit Rigand, aji Baraba na!” Si Baraba re yipa raskol riga na yibnonj.

19

Pilatoma Kikitum B'isagika Yit Yesund Idrikam (Mat 27:15-31; Mak 15:6-20; Luk 23:13-25)

¹ Si onggit penaemb Pilato geja riga engainonj Yesund okatam dide iraskam. ² I iraska seg ke geja rigap ket dingding kai dira pila yogauko dide ket itemb dira Yesum mopind yikito king pila. I ton ket king pila kuskus kobirgim kwa Tin yikito. ³ Seg ton ket Yesum wip wa wuwenonj odede yit kima da, “Simesime! Ju riga wa king!” dide ket ana yipokeno. ⁴ Seg ket Pilato b'usaya bau wa opendonj dide ket ten amninonj da, “Yir de, kon nok ma Tin iyin wa pilwa, nokim da idenat win wumir okasya da kon maka nanggamog negir mile na yodaraen Ti pilind.” ⁵ Si ket Yesu bau wa opendonj dingding kai ke ogauki dira b'ikiti dide kuskus kobirgim b'ikiti. Seg Pilato ten amninonj da, “Yir de, itemb ji Riga!” ⁶ I re yina mopyam si rigap dide yinamet yir ipka rigap Yesund yir yongo, ton unena kima ognento da, “Wul b'agbagind yidrike! Wul b'agbagind yidrike!” Si Pilato ket ten amninonj da, “Win walenggyam Tin yokata, dide wul b'agbagind yidrika! Mop nokip kon maka nanggamog negir mile na yodaraen Ti pilind.” ⁷ Seg Ju rigap ket tin mira yomno da, “Sowa ita ji gog yit, i onggityam gog yit kae Ton b'ogla uj okas, nokip Ton Tilenggyam b'agenayonj Godimna B'igam.”

⁸ I re Pilato onggityam yit utkundonj, ton kwa ket ma sobijog na moga awonj. ⁹ Si ton ket b'usaya itendonj tina wikopu met wingir wa dide ket Yesund yomnonj da, “Ringkae Man metkot?”

Aji Yesu maka tin yismonggawonj. ¹⁰ Si onggit penaemb Pilato Yesund yomnonj da, “Ma Man ma ita nitismonggaet? Ma Man wumir et da kor ita danda Men itrindam dide kor ita danda Men wul b'agbagind idrikam?” ¹¹ I Yesu ket mira yomnonj da, “Mor ma ita nanggamog danda Kor pilind oramitam, aji inta ra God mor motkau. Si onggit paemb moina negir mile re ma ukoi e, aji yete re Ken nitii mor pilwa, ti re ukoi jog negir mile e.” ¹² Si onggit yit map Pilato ket nya oraka yiyenonj Tin itrindam. Aji Ju rigap unena kima ognento da, “Ra man onggit Rigand itrindenjit, man ma Roma mopyam king Kaisamna riga et. Yet ra tilenggyam b'atgenai kingim, ton re Roma mopyam king Kaisamna geja riga e.”

¹³ Si re Pilato onggityam yit utkondonj, ton kea ket Yesund yopendonj bau wa dide ket tina b'isagikapu kasa kumbind omitonj rina re onggit pipmetind yibnonj ogenaya da Kila pipmet, i Ibru yit ke da Gabata. ¹⁴ Si onggityam mile re Ju riga waina Uj Igwanti Nony Iyena Diyamdiyam Win b'angonjenam bibir nat aukonj, i ket lomtik gatab awonj. Seg Pilato ket Ju riga amninonj da, “Yir yonga, itemb waina king!” ¹⁵ Si ton yipand unena kima ognento da, “Yeomnene! Yeomnene! Wul b'agbagind yidrike!” I Pilato ket ten amninonj da, “Ringma, kon b'ogil e waina king wul b'agbagind idriken?” Seg yina mopyam si rigap tin yismonggawo da, “Sowa awir e king, aji Roma mopyam king Kaisata.” ¹⁶ Ngirpu ket Pilato onggit winind Yesund towa yimind yoramitonj wul b'agbagind idrikam.

*Yesu ma Uj Wul B'agbagind
(Mat 27:32-44; Mak 15:21-32; Luk 23:26-43)*

Si geja rigap ket Yesund yokato. ¹⁷ Si Yesu Tina wul b'agbag kawar wa yomnonj i ket opmarkitonj i dide ket yikonj de onggit pipmet wa ogenaya da Mopkak Wimenapu Tungg, Ibru yit ke da Golgota. ¹⁸ I omandemb ket Tin wul b'agbagind yidriko. I kwa nimog riga Ti yiu ke yiu ke edriko, si Yesu re towa inyiny nat yibnonj. ¹⁹ Seg Pilato ket Yesu ma ongandam mop yitkak yirikonj wulpagimind dide ket Tina wul b'agbag pumb ke yoramitonj. Si ija naemb iriki yibnonj da,

“NAJARET TUNGGAM YESU, JU RIGA WA KING”.

²⁰ Si Ju riga wingirind jogjog rigap onggityam on-gandam mop iriki ogenka yiyeno, nokip itemb pipmet rikind re Yesund wul b'agbagind yidriko re Yerusalem taun wus nat yibnonj. I onggityam mop yitkak iriki yibnonj re Ibru yit i Latin yit dide Grik yit kena. ²¹ Si onggit penaemb Ju riga waina yina mopyam si rigap Pilatond yomno da, “Goro irikim da, ‘Ju riga ma king’, aji ija na iriket da, ‘Onggit rigat b'agenayonj da Konten Ju riga wa king.’ ” ²² I Pilato ket ten esmonggainonj da, “Nangga na re kon yiriken, b'ogla iriki yebim.”

²³ I re geja rigap Yesund wul b'agbagind yidriko, ton Yesumna tumind kobirgim emdito dide ket onggityam kobirgim powa (4) geja rigap yipayipa b'asos wuwenonj. I ton kwa ket yokato wingir ke kobirgim. Aji onggityam kobirgim re yipaina kib na dide kupka yipaina onki na yibnonj kuna ke ideni de pis wa. ²⁴ Si onggit penaemb ton towa wingirind endento da, “Goro men onggityam kobirgim yenyoku aji men b'ogla pes b'areninum

i ingkaemb ket yipa rigat okas.” Si onggit mop penaemb onggityam mile aukonj da onggityam yitkak ririrkip tainy rinte re yina peband iriki yibim da,

“Ton Koina kobirgim towanim ataikito,
dide Koina yipa kobirgim okatam pes
b'arento.”

Si onggit penaemb geja rigap odede mile amnikto.
²⁵ I Yesu ma wul b'agbag wusind kea onyiti wekenonj dikind Ti mog Mariya i Ti kom mog i Klopamna kongga Mariya i dide Magdala tunggam Mariya. ²⁶ I re Yesu Ti mog dide Tina singi iyeni b'auyaena riga Ti wusind onyiti yir angonj, Ton Ti mogind womnonj da, “Kongga, yir de itemb mor b'iga.” ²⁷ Dide ket daka onggit b'auyaena rigand yomnonj da, “Yir de, itomb mor mog.” Seg ket onggit win natemb onggit b'auyaena rigat tin wiyonj tina met wa.

Yesu ma Uj

(Mat 27:45-56; Mak 15:33-41; Luk 23:44-49)

²⁸ I onggit kak ke Yesu kea wumir yokatonj da komkesa gasa kemb undwatanj. Si Yesu yindenonj da, “Kon nyipa en.” Nokim da idenat yina peba yitkak ririrkip tainy. ²⁹ I ademb de tokiltokil ik besenind yindangir yibnonj. I rigap nyi ingmatena ingmatena matres pila gasa ke onggityam tokiltokil ik besen wa yisonggo i yisop tibkak ke yipo dide ket Yesumna tugim wa yurowato onayam. ³⁰ I re Yesu onggityam tokiltokil ik yonayonj, Ton ket yindonj da, “Kemb yundwasin.” Seg ket as eamantonj, dide ket Tina wingawinga ewaikitonj.

31 I ket b'angonjena bibir na awonj. I Ju rigap ma singi na da ujjim wul b'agbag kumbind tekeny onggityam towaina wiram dide yir opmitena bibirind. Mop nokip onggityam towaina wiram dide yir opmitena bibir re naskajog bibir na Ju riga waina Uj Igwanti Nony Iyena Diyamdiyam Win wingirind, si Ju rigap itemb bibir ukoi jog yisnaeneno. Si onggit penaemb ton Pilatond yigekito towaina selkak onygikam dide ujjim ewaikuram. 32 Si onggit penaemb geja rigap wuwonj dide ket naskanyam riga selkak yonygiko i kwa ket daka yipa rina re Yesu kima idriki ebnonda. 33 I re ton Yesum pilwa tuwonj, ton kea yir yongo da Ton re kea uj yokas. Si ton maka Tin selkak yonygiko. 34 Aji onggit geja riga wa wingirind yipa rigat nim ke Yesund yiponj yororand. I odenja ket kus ake nyi opekonda. 35 I yet re onggityam mile yir yongonj, tontemb yir ungata yit yopureny. Si tina yir ungata yit re iminjog e. I itemb riga wumir e da ton iminjog yit im apureniny, nokim da idenat wida kwa gar ke utkunda oramisya. 36 I onggityam mile aukito re nok mana da idenat onggityam yina peba yitkak ririrkip tainy da, "Makwa ita yipa Tina kak tiposik." 37 I daka kwa b'enga yina peba yitkakit yindeney da, "Rigap opima onggit Rigand yir ongi dem yena ra ipi dem."

Yesu ma Eungita

(Mat 27:57-61; Mak 15:42-47; Luk 23:50-56)

38 I Arimataya tunggam Yosep re yipa Yesumna b'auyaena riga na yibnonj, aji ton Ju riga moga map onggityam wumir wigawiga na yowamonj. I

re Yesu uj awonj, ton Pilatond yerkitonj Yesumna ujugim okatam. I Pilato ket yingawonj. Si ton yikonj dide ket Tina ujugim yokatonj. ³⁹ I Nikodemo yet re naskand Yesund yodaronj yipa siwinyind, to-daka b'ogil ngirangngirang wulpoj teyinonj ujugim eungitam. I onggityam wulpoj bebig re ama rika teti powa (34) kilogram na. ⁴⁰ Si ton ninda riga kima Yesumna ujugim yiyo. I ton ngirangngirang wulpoj kima na kobirgim isetiki ke ujugim ogauka yiyeno. Si ton yomniko re Ju riga waina eungitam mile kena. ⁴¹ I yipa sopapu kea de yibnonj onggit pipmet wusind rikind re Yesund wul b'agbagind yidriko. I onggit sopapund kea yipa sisil gopmet yibnonj rina re makwa ke yipa riga naskand yeungito. ⁴² I itemb bibir re Ju riga waina b'angonjena bibir na, dide kwa itemb gopmet re wus nat yibnonj. Si onggit penaemb ton dikindemb Yesund yeungito.

20

Yesu ma Utnyita

(Mat 28:1-10; Mak 16:1-8; Luk 24:1-12)

¹ I re Ju riga waina wiram dide yir opmitena bibir kak ke naskajog bibir awonj, Magdala tunggam Mariya sitawarjog si borand wikonj Yesu ma gopmet wa. Seg ton kea onggityam gopmet idokapu ukoi gimmo ururkiti yir yongonj gopmet mora yurund. ² Si onggit penaemb ton b'ikonj Simon Petro dide Yesu ma singi iyeni b'auyaena riga wa pilwa. Dide ket ten amnonj da, "Ton ke Yonggyamimna ujugim yokasi gopmet ke. Si sin ma wumir im rokate Tin yoramisi." ³ Seg Petro dide

itemb b'auyaena riga yiwatonda Yesumna gopmet wa. ⁴ I ton gilgil b'ikonda, aji itemb b'auyaena riga Petrond yisalngitonj dide ket naska opendonj de gopmet wa. ⁵ I ton ket uwontonj dide ket isetiki kobirgim ondriki yir anginonj onggit gimo yiund oski gopmet wingirind. Aji ton maike gopmet wingir wa b'igaronj. ⁶ I Simon Petro yimta kena opendonj dide ket gopmet wingir wa b'igaronj. Si toda kwa kea yir anginonj isetiki kobirgim ondriki. ⁷ I onggityam mop paspas kobirgim rina re Yesu ma mopind ijobiki yibnonj, ton re ma ninda isetiki kobirgim kima na yipand yibnonj. Aji yipa b'enga pipmet nat eoromki yibnonj. ⁸ Si onggit b'auyaena rigat yet re naska opendonj, todaka idenatemb gopmet wingir wa b'igaronj. Dide ket yir anginonj i ket ton gar ke utkunda yoramitonj. ⁹ Nokip ton makwa ke nony aukonda onggityam yina peba yitkak da, "Ton b'ogla uj ke tutnyis." ¹⁰ Si kwa osiemb nimog b'auyaena riga itendonda towaina wimenapu wa.

Yesu Magdala Tunggam Mariyam pilwa Pita Awonj

(Mat 28:9-10; Mak 16:9-11)

¹¹ Aji Mariya re bau ke gimo yiund oski gopmet wip owarkiti na yowamonj yii iyagikand. I ton yii iyagika kima uwontonj dide ket itemb gimo yiund oski gopmet wingir wa yir wikenonj. ¹² I ton ket nimog aneru yir angonj bilbil kobirgim b'ikoki. Ton re omi na ebnonda rikind re Yesu ma ujgim yibnonj, yipa re mop ke i yipa re pis ke. ¹³ I anerup tin wigekitonda da, "Kongga! Nangga pae man yii b'irinenyit?" Si Mariya ket ten amnonj da, "Ton

ke kor Yonggyamimna ujgim yokasi. Si kon ma wumir en rokate Tin yoramisi.” ¹⁴ I onggit yit seg ke Mariya kak wa itaingitonj dide Yesund dikinda onyiti yir yongonj. Aji ton maka yongwatonj da Yesute. ¹⁵ I Yesu ket tin wigekitonj da, “Kongga! Nangga pae man yii b'irinenyit? Yena man oraka yiyenyit?” I onggit konggat ija na nony awonj da Ton re onggityam sopapu yir ipka riga e. Si ton Tin yomnonj da, “Ukoyam! Rada manit Tin yiyit, ken wumir nomne rokate man Tin yoramisit. Si kon ita Tin okatam yopen.” ¹⁶ I Yesu ket tin womnonj da, “Mariya!” Si ton ket wip yowarkitonj dide ket Tin Ibru yit ke yomnonj da, “Rabuni!” isipkita yitkak da ouyaena riga. ¹⁷ I ket Yesu tin womnonj da, “Goro man Ken netisopayim! Nokip Kon makaya pumb wa neken Kor B'uim pilwa. Aji man meke Koina gar ke utkunda yingganwar wa pilwa dide ten wumir tamninyit da, ‘Kon pumb wa neken Kor B'uim pilwa yete re wa B'u, i Kor Godim pilwa yete re wa God’.” ¹⁸ Seg Magdala tunggam Mariya ket wikonj b'auyaena riga wa pilwa, dide ket bage wikonj da, “Kon kea Yonggyamind yir yongen.” I ket ten wumir amninonj rija na re Yesu tin wumir womnenonj.

*Yesu Tina B'auyaena Riga wa pilwa Pita Awonj
(Mat 28:16-20; Mak 16:14-18; Luk 24:36-49)*

¹⁹ I onggit Ju riga waina wiram dide yir opmitena bibir kak ke naskajog bibirind b'auyaena rigap kea yipand b'eomto si imokand. I ton re Ju riga wa moga mapena mora b'idoki wekenonj. I odedend ket Yesu yikonj dide towa wipind onyitonj. I Ton ket ten amninonj da, “Ngimbla win kima!” ²⁰ I

onggit yit seg ke Yesu towa auyainonj Tina yim dide yorora. Si re b'auyaena rigap Yonggyamind yir yongo, ton ket ma sobijog sam na aukito. ²¹ I Yesu b'usaya ket ten amninonj da, “Ngimbla win kima! Kor B'u kea Ken nitmikitonj, i Kodaka odede wip kaim wen tetmikisinyin.” ²² I onggit yit seg ke Ton nyonya unggulitonj towa pilwa dide ket ten amninonj da, “Yinayina Wingawingand yokata! ²³ Ra win yama na ra negir mile awir tamnikaindam, si onggityam towaina negir mile ra opima awir taukanj. I ra win towa negir mile terarkaindam, si towaina negir mile ra indaima tekeny towa pilind.”

Yesu Tomam pilwa Pita Awonj

²⁴ I twelp (12) itmikitijog riga wa wingirind yipa riga Toma, i ti kwa yipa nyi da Didimo, ton maike yibnonj opimemb ninda itmikitijog riga kima, re Yesu towa pilind pitapita awonj. ²⁵ Si onggit pe-naemb ninda b'auyaena rigap tin wumir yomno da, “Sin kea Yonggyamind yir yongu.” Aji Toma ten amninonj da, “Ra kon maka Tina yimind nil yira yir tangen dide ra kon maka onggityam nil yira tasopaen koina yimkak ke, i dide ra kon maka Tina yorora esopaen koina yim ke, si kon makwa ita gar ke utkunda oramisin.” ²⁶ I eit (8) bibir kak ke Tina b'auyaena riga re b'usaya met wingir nat wekenonj, si Toma toda omanda ton kima yibnonj. I mora re idoki na wekenonj, aji Yesu kea ikonj wingir wa dide ket onyitonj towa wipind, i dide ket yindonj da, “Ngimbla win kima!” ²⁷ I Yesu ket Tomand yomnonj da, “Mobe moina yimkak teyinim dikind yira esopayam dide Koina yim yir

ange. I moina yim teyinim dide ket Koina yorora yira yesopae. Si goro gar ke utkunda kesa riga tawim, aji gar ke utkunda riga na taet!” ²⁸ Seg Toma ket Tin yomnonj da, “Kor Yonggyam dide kor God!” ²⁹ Si Yesu tin yomnonj da, “Rika nok pae man gar ke utkunda ke nokasit, nokip kemb man Ken yir nonget? Si yepiya ra maka Ken yir notngi, aji ton gar ke utkunda ke notkasi, ton re God ma b'ogil omni riga im.”

Peba Irikam Mop

³⁰ I Yesu kwa ninda jogjog kid kesa kima danda wiko amnikinonj Tina b'auyaena riga wa wipind. Aji onggityam wiko gatab awir im iriki wekeny onggit peba wingirind. ³¹ Aji kon onggityam yitkak erikinyin re nok mim da idenat win gar ke utkunda oramisya da Yesu re Keriso e, Godimna B'iga e, dide nokim da idenat win gar ke utkunda ke yirkokar okasya Tina nyiwim pilind.

21

Yesu Seben (7) B'auyaena Riga wa pilwa Pita Awonj

¹ I onggit kak ke Yesu b'usaya Tilenggyam pita awonj Tina b'auyaena riga wa pilwa Tiberiya sipa yurund. Si ija naemb ji pita awonj. ² Si ton-piyamb ji riga yipand wekenonj opi re Simon Petro i Toma ogenaya da Didimo i Natanael yet re ikonj Kana tungg ke Galili eriya wingirind i Jebedaimna b'iga nimog i dide kwa nimog riga osi Yesu ma b'auyaena riga wingirind. ³ I Simon Petro ten amninonj da, “Kon kabum iwika ma neken.” Si

toda ket tin yomno da, “Sida man kima wuyina.” I ton ket wuwonj dide ket giga wa angurkito. Aji onggit siwinyind ton makwa nangga na ewikto. ⁴ I re sitawarjog awonj, Yesu kea ket onyitonj onggit sipa yurund. Aji b'auyaena rigap Tin maka yongwato da Yesute. ⁵ I Yesu ket ten arkisinonj da, “Kor b'igawar! Ke ngai nangga kabum na win ewikindam?” I ton mira yomno da, “Makwa o.” ⁶ Si Yesu ten amninonj da, “Gir b'iska giga yimjog tab ke! Si win opima kabum temjindam.” Si onggit penaemb ton gir b'isko i ket ma yipa kima kabum na gir borand wekenonj, si ton ma ririr na irginatam towaina danda ke. ⁷ Si onggit penaemb Yesu ma itemb singi iyeni b'auyaena rigat Petronj yomnonj da, “Yonggyamte!” Seg re Simon Petro yutkundonj da, “Yonggyamte,” ton tina tumind kobirgim ke b'ibgonj, nokip ton wi kesa na yibnonj. I ton ket sipa wa unykitonj. ⁸ Aji ninda b'auyaena rigap yimta na kabum kima gir igonyigony yiyo giga nya de yuru wa, mop nokip yuru ke pin re ama rika nainti (90) mita na. ⁹ I re ton gil wa ipkito, ton kea yir angto wul itani dide kabum wulind, i kwa sana. ¹⁰ I Yesu ten amninonj da, “Ninda kabum teyinam rina re win otade ewikindam!” ¹¹ Si Simon Petro giga wa angitonj dide gir igonyigony yiyonj gil wa. I gir borand ukoi kabum re wan andred pipti tri (153) na wekenonj. I nangga ma ji da odede jogjog kabum na, aji gir maike inyoukonj. ¹² I Yesu ket ten amninonj da, “Tuyim ayo! Sitawar diyam aina!” Aji b'auyaena riga wingirind makwa yipa rigat pitakipind Tin erkitam yomnonj odedemb da, “Yetet Man?” Nokip ton kea wumir yokato

da Yonggyamte. ¹³ I Yesu ket yikonj sana okatam dide ket towa akainonj. I kwa toda ija na kabum yomnikonj. ¹⁴ I Yesu uj ke Tina utnyita kak ke kea Tina b'auyaena riga wa wipind pita aenonj. Si itemb re ji nowa manaemb ket.

Yesu ake Petro

¹⁵ I re ton sitawar diyam seg aukito, Yesu Simon Petron d yigekitonj da, “Yoaninna b'iga Simon! Ma man ita Ken ukoi singi niyenyit aji onggityam ninda rigap ma ukoi kana e singi niyenyi?” Si Petro Tin mira yomnonj da, “Owi, Yonggyam! Man wumir et da kon ita singi miyenyin.” I Yesu ket tin yomnonj da, “Koina mamoi tangeninyit!” ¹⁶ I Yesu b'usaya Petron d yigekitonj da, “Yoaninna b'iga Simon! Ita man Ken singi niyenyit?” Si Petro mira yomnonj da, “Owi, Yonggyam! Man wumir et da kon ita singi miyenyin.” I Yesu ket tin yomnonj da, “Koina mamoi yir tepkinyit!” ¹⁷ I Yesu nowam ket tin yigekitonj da, “Yoaninna b'iga Simon! Ita man Ken singi niyenyit?” Si Petro ket gar bebig awonj nokip Ton nowa manaemb ket tin yigekitonj da, “Ita man Ken singi niyenyit?” I Petro ket Tin mira yomnonj da, “Yonggyam! Man wumir et komkesa gasa. Si Man wumir et da kon ita singi miyenyin.” I Yesu ket kwa tin yomnonj da, “Koina mamoi tangeninyit! ¹⁸ Kon iminjogjog men motinyin. Ite re man sisil rigand mibnyit, man ririr e aenyit molenggyam rob b'ikonenam dide menamenam ritata ra man singi taet menonim. Aji ra man mid taet, man osiya moina yim tetniket, i yipa rigat men rob mitkiteny dide ket men mitiyeny

ritata ra man maka singi taet menonim.”* 19 Yesu onggityam yit yindonj re ouyawa mana da Petro ridede nya kae uj okas dem dide Godim b'ogil inyomarena okau dem. I onggit yit opurena seg ke, Ton Petronj da, “Ken yimta nundoke!”

Yesu dide Tina Singi Iyeni B'auyaena Riga

20 I Petro wip engendonj dide ket yirik yunjomkitonj itemb Yesu ma singi iyeni b'auyaena rigand re tin yimta yundokonj. I tonitemb ji riga yet re Yesum wus ke b'irmekiti omi yibnonj kikitum diyamdiyam winind dide Yesund yerkitonj da, “Yonggyam! Yetemb ji riga ra Men tib mii?” 21 I re Petro tin yir yongonj, ton ket Yesund yigekitonj da, “Yonggyam! Si ringma ji daka itemb riga tau dem?” 22 Si Yesu ket tin mira yomnonj da, “Ra Kon singi taen da ton yilo ibim ngirpu ra Kon titenjin dem, itemb re ma man kima yit e. Man yimta nundoke!” 23 Si onggit penaemb onggityam yit warabag aukonj gar ke utkunda nany dide yingganwar wa pilwa da, “Onggit b'auyaena rigat ma ita uj okas.” Aji Yesu maka odede yindonj da, “Ton ma ita uj okas,” aji ija na da, “Ra Kon singi taen da ton yilo ibim ngirpu ra Kon titenjin dem, itemb re ma man kima yit e.”

24 Ton itemb ji b'auyaena riga yete re yir ungata yit pitapita amneniny onggityam gatab dide yete re onggityam peba yirik. Si men wumir im da tina yir ungata yit re iminjog im.

25 I opima ta kwa ninda jogjog gasa rina re Yesu amnikinonj. Si rako onggityam komkesa

* **21:18:** Onggit winind b'itrari riga nena ririr na tina rob tilenggyam b'ikitam.

yipayipa gasa iriki wekeny, kon nony aen da
kupka gowukoyit makwa ririr e onggityam iriki
peba tawaminy.

Wipi Yit God ma Yina Sisil Yina Peba
The New Testament in the Wipi Language of Papua
New Guinea
Nupela Testamen long tokples Wipi long Niugini

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 21 Feb 2024 from source files dated 31 Aug 2023

a5a5213a-fb12-52b5-9c99-efb8044c6646